

04142

7622

陽復齋文集

上冊



上海佛學書局印行



2952780

陽復齋文集

目次
上冊

論議類

廣立命篇

教學簡說

戒淺學寫聖毀經篇

讀書及處事方法

論語學而時習之章講義

覺齋說

孟子盡心章講義

求雨說告村人

字見說

小學教學大綱

小學精選經史子集教材說略

傳誌類

亡妻汪氏略狀

父母程太君墓志銘

請舟府君行述

南通馬卿庵往生傳

徐母節孝祠碑銘

婺源八二老人汪序昭生西記

序跋類

雲濤孟蘭盆會誦經會序

讀丁氏一切經音義提要書後

戒殺放生集序

因果錄序

題雍正上諭平論三教後

慧茂齋跋

題周少喬翁行狀

題錦城族兄像

題植棠藏龍光公臨蘭亭手卷

程筱鵬弘化日誌序

書印光法師汪含章夫人往生後

慈悲水懺題辭

壘荒說略序

新聞報三十年紀念序

諸經首章大義會編序

歙邑羅守恆讀

費範九印行羅繪大士像誌

寄徐樞卿暨德配戴夫人六十文

雜記類

敦復堂題記

楚天記

丁卯秋節前諭兒

記舒載吾語

慎修公弄丸園題記

擬改聖哲畫像記末後一段

講演類

佛法之宇宙觀人生觀亦觀

佛光社第一次社友大會演詞

佛七圓滿日告同社諸友

安徽第二師範學校演詞

華嚴念佛三昧論發旨

救火須知

蕙江宗祠設佛光社之說明

教練團防要義與各縣長書

與劉中盛縣長書

哀祭類

祭蕙江三十二世與伯公八十冥壽

祭先考晴府府君文

代義成作祭文

祭汪游外舅母老人哀辭

祭祖母曾氏太夫人百歲壽文

代長遠作舅祭舅母文

起發祭文擬式

成主祭文

請主人贈祭

祭先母汪太夫人文

宏通孫祭祖母汪文

疏類

五十生年爺仰道場疏

妻汪氏五十生年設施食道場疏

禮齊雲山上帝道場疏

代汪有八十壽施食疏

爲大暇汪啓賢壽祖母疏

爲大暇火災修齋疏

代汪義成撰禮上帝疏

又代撰報恩疏

代汪女居士賜孤疏

代撰汪清明賑孤疏

代撰汪鍾峻父施食疏

集賑日本災災疏

祭周王請弑殺文

爲汪煥輝作薦父疏

代汪作屏賑孤存祖報恩疏

吳韻香禱上帝疏

爲母汪賑孤作增上勝緣疏

祀建祠建寺諸樹神疏

聽松庵新殿落成供佛疏

議述類

開放山場廣興墾植議

改良婚禮爲建國興家之首善法

念佛儀

念佛觀想勝告行法

普勸修行要則

救劫弭災修身化俗要法

誦經題主儀式

村人布施作福並勸戒殺放生帖

兩漢興學勸農詔令序

韓烈士黃梅吳詩文序

李毅達郵益稿跋

學校雜誌發刊辭

題紡織生張琴卷

募建金山碧雲庵啓

題錫之族伯父位

大峨感恩寺記

詹節母汪宜人墓志銘

吳君念穆墓表

詹逢伯公步雲公墓誌銘

祭秋浦叔文

安葬詹太夫人墓祭文

全村賑孤疏

作福報恩疏

附賑孤甘聯區

賑孤酬頌文

辛酉生祠捐振蘇皖浙水災疏

爲北方災民祈禱疏

禮儀疏文

陽復齋文集 論議類

陽復齋居士江 謙著

廣立命篇

袁了凡立命篇爲世間法。此兼言出世法。故曰廣也。

學士愚夫。莫不信命。先佛先聖。未嘗否命。生命之學。由來遠矣。命與性別。真如本體。無妄無異。無人我相。無衆生相。無壽者相。不生不滅。是之謂性。心本無生。因於塵境。起心口意。三善惡業。因業善惡。受苦樂報。因報受身。有生有滅。是之謂命。

是故達人。欲知命者。當觀三世。以今樂報。知夙善因。以今苦報。知夙惡因。命由己立。禍福自求。非天所予。非人能害。劣應懺悔。勝益勤修。若不爾者。以今惡因。又招後報。立命有二。一世間命。二出世命。世間福命。應修五戒。乃至十善。五戒生人。十善生天。一者戒殺修仁。長壽少病。多賢子孫。二者戒盜修義。廉取好施。所生富有。三者戒淫修禮。世譽尊榮。眷屬如意。四者戒妄修信。凡所言說。得人欽重。五者戒酒修智。清靜智慧。不墮愚癡。是爲五戒。由斯精進。則爲十善。不殺不盜。乃復不淫。爲身三善。兩舌

惡口。妄言綺語。四皆不犯。爲口四善。無貪瞋癡。爲意三善。此十善因。當生天上。受勝妙樂。世間福報。如斯極矣。惟是世福。皆非眞常。如露如雲。如夢如幻。報盡命終。還當流墮。修羅畜生。餓鬼地獄。是皆難免。是故達人。當加精進。立出世命。

出世命者。生淨土。是蓮胎化現。斷分段生。則壽無量。脫輪迴苦。受究竟樂。金地寶閣。迴非塵境。天衣上味。不事縫飪。水鳥樹林。猶演妙法。不見惡事。不聞惡名。則福無量。菩薩羅漢。聚集薰陶。則眷屬無量。親佛聞法。一生補處。則成就無量。是謂盡性。是謂至命。或疑此願。曠劫難成。不知西方有佛。號阿彌陀。發大誓願。普接衆生。若不爾者。誓不成佛。立是命者。專念佛名。兼修衆善。信深願切。佛心接引。命終心一。無不生者。生命之學。觀止於是。蔑以加矣。今推命者。消息五行。而知禍福。何以故爾。佛言三界唯識所成。動根攝塵。無非識者。由識動故。收攬四大。地水火風。四大假合。以爲此身。世界萬物。亦復如是。凡識之動。爲善爲惡。輒爲種子。藏蓄識田。經劫不失。種熟根茁。處胎受生。因緣時節。牽會發動。爲苦爲樂。是故果報。皆由宿因。五行之分。卽原四大。

後天坎離。是曰水火。金木土三。皆歸於地。生剋運化。是名爲風。四大五行。彌綸磅礴。空間時間。身內身外。無所不在。無息或停。運爲五時。變爲五氣。蘊爲五味。彰爲五色。稟爲五臟。宣爲五竅。動爲五志。感爲五欲。發爲五音。現爲五事。本爲五常。敘爲五倫。天爲五星。地爲五方。變化紛紜。非一非異。非大非小。非近非遠。非顯非隱。唯是一心。中和爲福。偏黨爲災。感應道交。不可思議。河圖洛書。陰陽千支。聖猶則之。其神者乎。非究佛典。孰知其原矣。

教學簡說

教學之道。三要四本。何謂三要。曰誠。曰相生相養。曰簡易切用。以是三要。而有三毋。毋偽。毋相殘相殺。毋繁難無用。何謂四本。學孔老佛。歸佛爲本。修孝弟慈。致孝爲本。治農工商。務農爲本。解形聲義。通聲爲本。本立而道生。欲速則不達。

戒淺學謗聖毀經篇

夫佛也老也孔也。如天地日月。吾人終身履戴瞻望讚歎。而曾不能知其德量之所

窮誠身心體驗數十年。或亦沉潛玩味數年。而後闕疑焉。而慎言其餘。則尙有一商之值。若略事翻閱。妄意思索。遂欲搖筆弄墨。論列是非。信口譏評。如堂上之法吏。判堂下之囚徒者。此風浸長。來茲後生。尙有修德講學地乎。此猶唾天謗地而障蔽日月。其能損之乎。自損已爾。予竊讀書之名數十年。自幼受書。卽習聞佛老異端之議。及後從事教育。又習聞歐俗進化之談。隨順俗學。爲疚多矣。近數年來。因病息轍。探討三聖大義。然後曉然於三教之當廣行。夫老子孔子。譬如中國之黃河揚子江。皆各收納百川。潤濟萬物。而佛爲之海。又近耽玩易義。而後知易之爲書。廣大精微。而復簡易切用。四聖精神所會。諸經大義所本。誠神聖契理契機之作。而萬世不易之經。設前此十年者。亦將爲時俗之說所惑。危哉今日之後生乎。精博如戴東原先生。其言性理。猶執著文字形義。以爲探道學之源。而疑宋儒之言。孔子出於佛老。不知不通佛老。決不能通孔。不通佛。尤決不能通孔老之奧。夫三聖者。比如天地日月。若非一氣所成。一體所現。而苟相乖違妨礙者。必不能永久相互存立於虛空之間。宋

儒竊其緒而猶避其名。戴氏知其然而猶疑其失。正學之難言也久矣。夫然則如之何而可。曰。精熟其教義而實體之於身心。敬以入之。久而持之。庶其通乎。

讀書及處事方法

一 經傳互解

二 理事互證

互解之法有三

一 相類互解

二 相似互解

三 相反互解

舉例如下

第一 子曰德之不修學之不講聞義不能徙不善不能改是吾憂也

此章言聖人行願自他不二修身爲本孔子言仁者不憂又言樂以忘憂而



此言是吾憂也。无憂者謂私欲之憂。有憂者謂義理之憂。聖人乘願而來正爲此事。

第二 子曰士而懷居不足以爲士矣

此章言不進則退。勿生貪着居則不思精進。不願利他德不修學不講聞義不能徙不善不能改。

第三 子曰邦有道危言危行邦無道危行言孫子曰法語之言能無從乎改之爲

貴巽與之言能無說乎。繹之爲貴說而不繹從而不改吾末如之何也已矣。此二章皆言隨順時機方便接引危言危行是聞義必徙不善必改言孫卽巽與之言周易巽爲風又巽入也風善入萬竅方便似之故曰巽與之言卽坎卦所謂納約自牖。

第四 子曰忠告而善導之不可則止無自辱焉子路曰子行三軍則誰與子曰暴

虎馮河死而無悔者吾不與也必也臨事而愬好謀而成者也。

此二章言和平毅力不可則止是和平好謀而成是毅力毋自辱謂不生瞋
恚非謂橫逆之加若橫逆之加雖佛天聖賢猶不能免臨事而思謂戒慎非
謂畏餒統觀以上數章則知聖人行願方便如此學者行願方便亦應如此
處事方法如此讀書方法亦應如此則打成一片通經可以致用

論語學而時習之章講義

學者覺也。明得真心。方爲正覺。知此真心。大包無外。細入無遺。天地萬物。皆於中現。
非從外有。萬有非有。唯是一心。心生法生。心滅法滅。從此修證。逐漸熏習。隨時隨在。
左右逢原。息妄歸真。去染全淨。如是爲學。悅可知矣。既以自利。復當利他。朋自遠來。
近者服矣。然根有利鈍。機有遲早。待時受化。強之則悖。仁者於此。憐愍隨順。不生瞋
慍。包涵並育。以待將來。可謂樂只君子。民之父母矣。

覺齋說

人患不覺。不覺則迷。迷則多失。失則多苦。如影隨形。感應甚速。深可憫也。世出世間。

佛爲正覺。既以自覺。還當覺人。以覺名齋。庶幾無昧。

孟子盡心章講義

豎窮三世橫遍十方之謂盡。盡其心者。知其性也。知其性則知佛矣。存其心。養其性。所以事佛也。天壽不貳。修身以俟之。所以作佛也。常念阿彌陀佛。求生極樂世界。與諸上善人。俱會一處。所以成佛也。孟子之言天。非六道中之天。謂理之極體耳。不言佛。不言淨土。於時佛法未東來也。

求雨說告村人

戒殺喫素念佛求雨。爲正法求雨。長鎗火銃扮戲接仙求雨。爲戲法求雨。明理之人。當用正法。不當用戲法。雨量多少。龍王要稟佛天之命。不能自主。故當求佛。且旱災之因。皆由衆生惡業所感。念佛可以懺除業障。但誠求之。感無不應。蓮池大師求雨。便是誠心念佛。前次念佛求雨。村中喫素之家甚少。幸得代表諸君誠心。故大雨三日。大家要想到沒飯喫沒水喫的苦。便覺得喫幾日清水飯。也是福氣。也是有味。喫

素自然誠心。求雨不必定要到遠方。就在茶培山念佛也。與靈山一樣。凡名山有泉水。四時不乾。便是有龍王護法。凡向佛求雨。第一要發懺悔心。懺悔罪業。第二要發大願。願大沛甘霖。普利衆生。方與佛心相應。若顧一村。不顧大局。顧自己不顧他人。便與佛心相反。便是旱災一切災之所由起也。

字兒說

名字性空。無施不可。我無始來。名字無量。數如恆沙。而於真我。皆無所著。然則我者。本非可名。假名之耳。而始有聲。書之簡策。乃復有形。聲轉形易。變化無窮。何哉。所謂我者。抑聞之莊子。名者。實之賓也。實之云者。本之於性。充之爲德。順性表德。如是爲名。然則名者。非我非非我也。君子以是修德務實。而豈徒名焉。王父名汝曰有朋。有朋者。樂羣也。禮記曰。敬業樂羣。論語記孔子之言曰。有朋自遠方來。不亦樂乎。王父以是屬望於汝也。吾今字汝曰予平。惟平也。而後能朋。大學曰。平天下。行之天下而無對者。行之平也。上聖不增。凡愚不減。我佛衆生。三無差別者。性之平也。予者我也。

平之自我。所謂君子修其身而天下平焉。循聲而轉。則曰雨蘋。曰與貧。雨蘋者潤益羣生之義也。取於蘋者。在水不著。和合相並而生焉。與貧者。財施法施無畏施。自利利他之義也。將以厚植汝德。尙勉之哉。

小學教學大綱

教學大綱。內容分三。一學年。二教法。三教課。

一學年

初級小學。自八歲起。修業四年。高級小學。修業二年。學力未熟者。留級補習。

二教法

鑑於今時學校。前課未熟。遽授後課之弊。因取逐步精進教法。每上課時。先將舊課考問成熟。始授新課。逐步精進。不得躐等。

鑑於今時學校。一師教授能力不能遍及多生之弊。因取教學相長。自覺覺他之旨。隨時挑取優材生爲助教。令優生增練習之功。劣生得輔助之益。教師每授一課。

至三復後。先令優生誦習。或作答。如全班中得半數或三分之一以上明白者。卽令爲助教生。由教師指定某生與某生同坐同習。課將畢時。則由各助教生報告某生某字未識。某生某句未熟。某生某義未明。記入逐日助教簿中。下課後或放學後。仍令各助教生負指導之責。至下一課上課時。教師按照各助教生所報告。逐一考問諸劣等生。皆得明白時。方爲前課完全成熟。然後教授新課。

鑑於今時學校。記定分數。漫無標準之弊。因取自己學業成熟。助他學業成熟。及助他品行改善。爲三種原則。自學成熟者。以八十分爲滿格。兼能助他學業成熟者。得至九十分。兼能助他品行改善者。得至百分。得九十分以上者。每學期終。記名嘉獎。或賞以有益心身之書籍及用物。

三教課

教課科目。分修身。識字。經學。選文。作文。算術。常識。

修身以躬行實踐爲主。兼講古今聖哲之嘉言懿行。尤須教師杜絕煙酒賭奢放逸。

之俗好。修養勤儉敬愛篤實之性。行以倡導之。鑑於今時學校。讀書不識字。不通六書形聲之弊。因倣王筠文字蒙求教法。先從象形指事會意形聲四門之字。分類認識。令知形體。至教授轉注假借二門時。兼講聲韻通轉及反切之法。歐文聲字。故學者從拼音入門。中國形字兼聲。故學者當從形體及聲韻入門。

未多識字。不強讀書。第一學年。以認滿二千字爲準。則專用單字。反復抽換。令其辨記。初三月中每日三四字。次三月中每日六字。後三月中每日十字。一年約可得二千字。然後教令讀書。自然順口。不爲難矣。

經學教法。初級小學。須讀完四書。先讀大學。以其條理分明。次讀論語。以其精要。次讀孟子。以其詳辨。次讀中庸。以其深廣。大學用古本。不取補傳。初級讀四書外。選讀啓蒙醒世之詩文。高級小學。專讀一經。又選讀經史子集中之真切裨益人心世道之詩文傳記。所專之經。視教師所素習擅長者定之。

佛經爲人天眼目。正學源泉。能使人修善止惡。向覺背迷。脫苦得樂。福慧雙修。自他

兼利。於六齋日。及房虛星昴日。擇要講授之。又選讀關於佛學之詩文。宋張商英云。吾惟學佛。然後知儒旨。哉斯言。佛理能通。通儒尤易。

溫故而後知新。庶幾能熟。每一星期。二星期。三星期。四星期。每一月。每一學期終。皆須溫習以前之功課。令其純熟。然後教授新課。

未能成誦。先與講解。心緒易亂。觀念難明。如以水投石。其勢不入。每課一段。俟其成誦。然後講解。則如石投水。其勢易入。又令優生試講。然後教師爲之訂正。則觀念益明。

未多讀書。不強作文。初級生第三學年。學作白話。第四學年。學作簡短文言。及日記書訊。高級生作文。解經義。論史事。述時事。及練習應用文。用文言者十之七八。用白話者十之二三。

算術先教心算。次教筆算。次教珠算。須練習純熟。以期實用。選擇算術教材。尤須隨時隨地。調查民生衣食住行所關之常識。

游藝一門以適用於身心修養。人生職業者爲準。則習字重應用小楷。練習鈔寫。體操重早操。及課後五分間運動。唱歌重讚揚聖哲。涵養德性。發舒自覺。覺他忠孝仁愛和平信義之精神。手工重簡易正當職業。適於生活。不取無益之美術。浪費物料。浪費精神。

常識一門。當採用最簡要而有系統之課本。並加增刪講授之。至於高級史地自然諸課。不取綜錯雜講之法。須一一連續講授。一種既畢。再講他種。令觀念熟。而系統明。

每一學期終。各教師敘述報告所教授之經驗。及學生成績。由校長審定印布之。本大綱進行次第。一草定細目。二廣徵討論。三實地試驗。四呈報政府。

小學精選經史子集教材說略

兒童記易而悟難。年長悟易而記難。故教授兒童讀書。當記悟參半。不可偏也。若偏於記。則無味而生厭。若偏於悟。則應讀而不讀之書多矣。時機一過。或終身不讀。或

讀亦難記。譬之種樹。記猶植根也。悟猶花果也。植根得活。異日花果可期也。無根而求花果。或欲同時而俱得之。必不可能矣。故小學於經史子集。皆須兼採。而務簡務精。孟子曰。吾於武城。取二三策而已矣。此選經之權輿也。

經表常道。史表記載。史之所記。果合常道。史亦經也。經之所載。皆前言往行。經亦史也。子集之例。以是推之。經云史云子云。集云者。從習稱爾。

以大學論語孟子中庸四書爲通諸經之本。初級小學讀之以尙書左傳爲通諸史之本。高級小學讀之。四書當全讀。尙書左傳則可選讀。詩惟二南全讀。風雅頌選讀。禮取五禮六官之略。及曲禮內則學記檀弓禮運王制。易取八卦及繫辭序卦。公羊穀梁之選。則附於左傳。

史官所掌。在褒善懲惡。故言動備書。學校之教。在隱惡揚善。故刪擇務簡。教之以善。則善心生焉。播之以惡。則惡種以滋。不可不慎也。自唐虞至秦。二千餘年。孔子刪書止存百篇。非堯舜禹湯伊尹傳說文武周公之大事不錄也。自漢至明。亦二千餘年。

二十四史。汗牛充棟。所載惡跡多矣。故須擇明王賢輔循吏大儒高僧孝子仁人之嘉言懿行讀之。至於歷代政教系統分明。莫如通史。當擇湯氏三。通考輯要選讀之。老子稱道德經。莊子稱南華經。其微言大義。揆之孔佛。無不同也。選讀子書。以老子及莊子內篇爲宗。餘子則略採之。

集之選。又加嚴焉。雖楊馬之賦。李杜之詩。韓歐之文。苟非合於經教者。無足選也。明文成公云。天下之大亂。由虛文勝而實行衰也。自曹孟德父子。倡虛文而薄實行。隋唐科舉之制。拔擢虛文。千餘年來。國政民生。咸受其弊。而混稱國粹。亦可羞矣。若夫陶淵明之詩。其高尚本於行。王陽明之文。其精通本於學。則非文人之文。詩人之詩。所能及也。惟淵明之詩。喜稱飲酒。陽明之文。間斥佛老。此其瑕也。當務去之。

佛爲欲色無色三界之大師。胎卵化濕四生之慈父。不聞佛法。雖遍讀經史子集四部之書。而於真實之宇宙觀。人生觀。猶盲如也。三歸五戒。爲入佛之門。三歸者。一歸依佛。以佛爲師。二歸依法。如法修行。三歸依僧。常親近供養菩薩聖衆。及當世之有

道賢僧。五戒者。一不殺生。二不偷盜。三不邪淫。四不妄語。五不飲酒。今世之得脫畜生餓鬼地獄三惡道者。宿世之歸依三寶者也。今世之幸獲人身者。宿世之曾持五戒者也。故三歸五戒。當爲初級小學普及之教育。而淨土一宗。尤爲解脫輪回。出凡入聖。鈍慧同修。卽生取辦唯一之法門。阿彌陀經。及無量壽經之四十八願。觀無量壽佛經之九品往生。卽爲說明淨土法門之要典。此外如法華之觀音普門品。楞嚴之大勢至念佛圓通章。華嚴之普賢十大願王。地藏經之利益存亡品。地神護法品。般若之心經。及往生咒。大悲呪。皆當以次講授之。至於宏揚佛法之文詩。如陰騭文。蓮池戒殺放生文。西方發願文等。及醒世讀佛讚淨土之詩歌偈頌。皆爲兒童最優之讀品。以是爲教。則正學日明。善人日多。善人日多。則事治功成。災消福集。而國焉有不興者乎。

陽復齋文集 傳誌類

亡妻汪氏略狀

江謙德薄障深。天降之罰。中年喪婦。視予良助。使高堂垂淚。弱子靡依。烏虀傷已。然內子含章隱德。與夫病逝始末。有不可沒者。謹略狀之。以告吾摯親舊。好修德愼終之君子加覽焉。內子生平孝順慈惠。施貧濟急。而儉薄自持。稟質弱而好苦行。善烹飪而淡於自食。購衣惠凍。而其衷衣必歷年補綴。不肯更爲。處上海紛華麗都之地。數年而不喜游觀。不效時服。每歲經紀家用。施捨之費。而不私蓄一錢。敬愛於親舊。貧窶而視世富貴崇高。淡如也。自歸謙三十三年。凡有善願。必助成之。凡去就進退。取與信仰之大義。無不同意。始謙隨張尙庵師。辦教育南通。歲費所入。泰半以貲寒士學費。而自用不足。內子則習紡織。期以自給。十數年來。謙以教育議院事。奔走京師。南京。安慶。上海。南通間。家事一委之內子。迄謙積損成疴。念佛習靜。而籌畫應付之事。內子一人當之。以是心力益瘁。頃數年來。虔心奉佛。戒殺放生。持六齋。觀音齋。

誦阿彌陀經般若心經法華普門品高王經往生咒白衣咒揚枝手大悲咒去秋以來病滯牀褥不獲如常課誦然常持念彌陀佛號及觀世音大勢至菩薩名號醫藥失宜病遂加劇自以堂上舅姑老母未送發大願作功德祈延壽命不謂天不假年竟於夏曆十一月朔日未時坐逝先一日夜深時語侍疾者取燭置牀上兩手作舉香狀謂侍者樓上佛堂木魚聲甚清越汝聞之乎又謂牀壁間皆金字經卷光耀燭目汝見之乎侍者以爲囁語也及晨預告家人今日卯未亥三時須爲我供佛自是不復語如入禪定有問候者領之而已果至未而逝逝時神色端肅自在無愁苦相落枕後面部冰冷而頂端猶溫沐浴後肢體柔軟前二日兩腳腫脹不能動屈而逝時盤曲如禪定狀自初逝時謙爲念大悲咒又得族中道友數人輪替相助凡誦大悲心陀羅尼三百餘卷自未至亥法音琅然然後念佛助之同向凡是諸端古德所傳稱爲瑞應惟是脫苦輪生淨土非求大德證印莫釋懸懸嗟夫娑婆苦多死生事大凡我親故具有悲懷登報以聞恕不週訃內子汪氏婺源大畝汪知極公女生光

緒乙亥四月二十三日申時歿。民國甲子夏曆十一月朔日未時。享年五十。子一有朋。生丁酉。女一有貞。生己酉。皆信佛。隨侍在側。親視含斂。孫一宏通。生甫彌月。江謙謹狀。

俞母程太君墓志銘

婺源賢母俞程太君旅卒於上海。後數月。其子朗溪介邑老江湘嵐觀察而請志於謙。啓曰。太君程氏。俞公履綏繼妻。而朗溪所自出也。卒年八十有二。子二。長悠。長卽朗溪。次悠貞。太君幼承庭訓。賢淑慈祥。二十六歸履綏公。甚相敬。而事姑孝謹。履綏公重義捨財。有夙逋貧不能償者。慨然免之。母死。族人某嘉公之義。以佳城見。謁謀遷其舊塚而葬焉。太君不可。謂當加封以慰逝者。族人歎服。其後公謀食蘇常。病逝毗陵。太君撫孤。修善愈力。朗溪以先人積善之報。獲利於商。迎母就養海上。稟承慈意。修諸善業。如修家譜。葺祠廟。拵故棺。濟貧乏。資婚嫁。築路建亭。造橋砌嶺。與夫國內外水災。風災。地震之災。或數千圓。或數百圓。隨機喜捨。當代俊傑。交口譽之。常以

積德遺後諄訓朗溪而曰力薄願奢吾有愧焉汝能自親而疏由族及邑乃至國人
俞門之光吾無憾矣摯哉仁言蓋其力有限而願無窮命終泰然預知時至契之古
記蓋生善道惜未信解念佛法門耳謙數年矣因病謝文韜筆斂楮不復爲役若勉
行布施嗜善若命傳善於子若傳寶珠珍玉如俞母者固當傳之以勸來善者重以
朗溪之請之固其又可辭况復朗溪方皈信三寶勤求淨業以正法報恩迴向親靈
期生淨土此爲孝思甯有遼竟夫極世間之榮博世間之譽以奉其親豈不震俗驚
時焜耀耳目昔人蓋嘗喻之如石暴火如電燦光雖燭一時闇可立待其或昌黎撰
志柳州屬文溢美虛詞壽之誦者文人所慕識者薄之甯若正法報恩眞常不滅致
無量壽放無量光永息輪迴生死長依清淨極樂善哉至矣此謂大孝勉之乎朗溪
銘曰。

曷歸乎歸於眞常惟母之德隱而章施捨以爲聚善以爲糧世福有盡兮出世無量
子能孝乎揚佛之光將母往生兮蓮華之邦侶隨大士兮兒侍法王乘願再來兮轉

此慈航。中華人民建國之十四年季秋月。前江蘇教育司長。三等嘉禾章。記名道尹。同邑江謙撰。

晴舟府君行述

蘭陵蕭氏。自唐上柱國江南節度使禎公。避亂居歙。易姓而江。二世董公。遷婺源。十八世敵公。遷江灣。至府君三十三世。府君體貌開偉而溫。秉性孝弟。慈仁而好學。生而好善。先祖父郡庠生興仁公。以勤學致病。旅卒於崇明。及長至老。讀公遺書。述所聞仁孝之行。敬之若聖神。嗟嘆以爲莫及。先祖母節孝詹太夫人。撫孤成立。性嚴。時有所責。輒喜笑承之。束髮授書。未熟。早就窗曙讀之。有所作。中夜篝燈起寫。年十八。往杭應商籍試。舟行泊岸。貧兒持餅餌食物紛至求售。必遍買之。而分餉同舟之人。曰。彼不得售。則一家終日飢。村中寡人。鬻破爛廢器。必優價收之。或詬無用。曰。唯無所可售。故當買之。寬惠好施。或自缺乏。無以應求。則轉貸而與之。未嘗追索。族先賢慎修公五世孫。子貧無以娶。爲集貲成婚。時給衣食。嘗設米肆拯貧。年必加本。每食

不肯獨享。必分家人侍者共之。兒童傭走。歡喜奉承。雖或怒責。無怨之者。於學綜觀四部三教之書。嘆仰佛老。而近跡周孔。謂漢文帝。光武。昭烈。能以帝王學道。昭烈誠子。勿以惡小而爲之。勿以善小而不爲。曰。此眞道學語。謂范仲淹。王陽明。能以儒者治兵。常稱清順治。康熙。雍正之學。而嘆乾隆疆宇未有之盛。自漢秦以來。謂吾蕭氏自漢丞相文終。候。至梁武帝。昭明太子。唐八葉宰相世家。至易姓始祖禎公。皆以大德保世。子孫毋忘舊緒。獨居動定。不欺暗室。喜買放生。物未嘗短價。或加與之。以六月十九日受生。敬禮觀音大士。中年購地築書舍。山溪縈抱。鑿池畜魚。植柳種竹。題曰柳竹山房。課子孫後俊。讀書養靜其中。四十餘年。熟史事。善爲通俗之講。兒童聽之。肅坐忘倦。終日筆札。至老不衰。家所藏書。皆經點墨註論。或諫太勞。曰。吾以救多人。晚年得閱淨土經論。尤讚王龍舒淨土文。曰。守是一編足矣。好自操細務。子孫乞代。強而後可。先一日。飲食行動書寫如常。次晨下牀小仆。中痰昏厥。家人畢集。進宣竅豁痰湯藥。猶能強視應聲。手足移動。謂得痰開。更無他病。共持大士名號。冀得挽。

復不意年衰氣乏。夜半痰聲漸沸。知已危篤。乃附耳勸請迴向西方。一心念佛。求生淨土。輪迴痛苦。生老病死。無能免者。得生極樂。壽命無量。菩薩爲伴。直至成佛。佛有誓願。臨終十念。皆得往生。佛語不虛。必蒙接引。如是請已。復附耳朗誦南無阿彌陀佛。已復勸請。如是請誦。至於三四。歷一時許。乃泰然而逝。如入禪定。家人夙聞淨土利益。力抑悲痛。齊聲念佛。淨業善友四人。竭誠相助。更一時許。揆之府君福德因緣。及如來誓願。當獲生西。過五時許。乃以香湯沐浴。含斂哭奠。悲乎痛哉。府君諱邦濟。字道卿。號晴舟。生咸豐辛亥六月十九日辰時。歿民國十四年乙丑夏曆十月十八日丑時。世壽七十有五。家母大畝汪氏。溫恭淑慎。皈信淨土。子三。長澍娶洪氏。次謙娶汪氏。次樾娶程氏。繼葉氏。以府君德教。澍經理崇明商業。督率家政。謙忝任南通師範校長。江蘇教育局長。南京高等師範校長。安徽省教育會長。及資政院衆議院議員。樾畢業法政大學。任安慶潁州徽州各省立師範中學教授。本縣縣教育局長。孫七。厚生。厚植。厚德。厚興。厚根。厚勤。厚誠。曾孫五。世英。世航。世華。熙周。新周。女四。長

適鴻村洪。次適曉鑪程。次適曹家坦葉。次適曉起汪。孫女二。未字。府君年十八。補浙商籍仁和邑庠生。捐加附貢生。清宣統間。以謙得保分部員外郎。誥封奉政大夫。昏啓之際。記綴萬一。倘得當世宏學仁人。憫而教之。或錫以文字。發其幽光。寶之後裔。則感且不朽。

南通馬聊庵居士往生傳

韓歐之文。程朱之學。數百年來學者宗之。然而標幟門戶。疑謗佛法。生不悟十方三世之圓音。歿不獲解脫輪迴之勝果。餘風所被。又足使聰明才辯之士。以拘墟爲醇正。以謗法爲名高。失衣裏之寶珠。植無間之苦本。齋公齋婆。非有甚深之學。甚麗之文也。然而聞因果之徵而信。聞極樂之樂而喜。持佛洪名。得佛接引。頓超濁海。上與聖流。天樂異香。爲之證信。含笑坐逝。豈能強爲。自漢以來。正法東漸。淨土聖賢錄。往生傳。居士傳。善女人傳。所載。代不乏人。傳不絕緒。然而學者學韓歐程朱之謗。則羣舉之。學齋公齋婆之信。則羣非之。衆生倒見。由來昔矣。若南通馬聊庵先生者。何其

異也。當予佐南通張菴庵師辦師範教育時。先生則已棄科舉習師範。創石港小學。歷任平潮市小學校長。教育會長。第二區學務委員。及勸學員。彼此各孳孳十數年。皆欲以上承孔孟之經。旁采歐美之藝。未嘗有一日相聚之緣。學佛之學。事佛之事。及予積損致病。因病求藥。久藥不効。於是得彭際清居士淨土三經起信論而好之。彭先生者。生清乾隆國學極盛之時。固嘗學程朱之學。韓歐之文。而宏之以佛者也。莊敬循誦。心意廓然。獲親善友。漸及諸經。歡喜感歎。恨見之晚。如生而盲人。暗中摸索。及耳以爲箕也。及尾以爲帚也。及足以爲柱也。一旦幸遇妙藥。目光炯然。獲見全象。與夫天地之大。庶物之繁。則且歡忻踴躍。欲徧天下之旨。如予者而告語之。及得普陀印光法師文鈔讀之。益喜蓮池滿益諸師復生人世。嘗請以貽同好。及南通師範學者。先生子七人。其長崑源。四靈源。七導源。皆嘗從學師範。靈源又方卒業南京高師。主南通師範教務事。得之以貽其親。於是先生披覽讚歎。歸心西方淨土。持誦佛號。日數百千聲。合掌移指端以記數。去秋因病持念尤勤。又誦般若心經甚利。於

民國十六年夏曆十一月廿日申時。捨報長逝。逝時猶端坐念阿彌陀佛。從容含笑。無愁苦狀。崑源等夙聞慎終之訓。勉抑哀情。齊稱佛號。懇求接引。逕往蓮邦。歷二小時。乃煎松枝檀香湯。親爲沐浴。肢節軟好如生。逾日而斂。里人臨哭者五百人。通俗於鄉先生故有諡。諡法五宗安之曰孝。寬樂令終曰靖。遂以孝靖先生稱之。先生生平無矜奇炫耀之迹。而敦孝友治言行。閭閻不疚於神明。自廿一歲爲州庠生。卽以教人讀書自利。利他爲志業。晚年修宗譜。葺祠宇。定祭儀。睦宗收族。其慮縝密。其動沖融。遭世之亂。與身之病。頓悟色空。緬懷淨土。福緣輳會。遂得生西。永謝輪迴。高參聖會。其夙植善因。而獲茲良果者。豈偶然也。夫佛謂人身難得。佛法難聞。寧非確論。一穴之蟻。數逾千萬。推之畜鬼地獄三途。胎卵濕化四生。其數無量。此皆落失人身。長淪苦趣。幸得人身。而孤窮下劣。文文無緣。幸讀詩書。而小技雕蟲。空糜精力。幸生富貴。而怙威肆惡。禍倍恆人。業力所牽。復淪惡道。升沉出沒。曾無已時。空負佛慈。長劫相待。彌陀易念而不知念。淨土易生而不願生。雖世智辨聰。虛名顯赫。無救生死。

莫脫苦輪。佛謂是人。可爲憐憫。若馬先生者。何其幸也。既逝之二月。崑源兄弟乃郵書述事以請於予。哀悲誠切。求爲之傳。以廣惠見聞。夫南通師範學者。二十年來。且數千人矣。其與先生志學行業遭遇同也。被先生之遺風。而能無動乎。先生諱炳。字曜青。晚號聊庵。清優附生。南通平潮市人。生同治元年十一月廿五日丑時。世壽六十有六。配田氏。子七。崑源。靈源。導源。皆卒業師範。職長教育。導源方遊學日本。岷源。恆源。匯源。謙源。業商。皆恂恂雅飭。不涉薄俗。邵子敏求所爲行狀甚詳。不具記。記其往生本事云。諫之以詩。詩曰。

馬子修飭爲人師。諸兒玉樹森庭墀。晚聞彌陀大誓願。更以般若當糧費。普陀老人助杭筏。良驥見影追風馳。從容捨報何暇豫。賴耶已入金蓮池。報恩無過念佛好。祝令淨國華開早。不違旦暮侍彌陀。遍向剎塵宏佛道。

中華民國十七年太歲戊辰孟春。婺源江謙敬撰。

徐母節孝祠碑銘

出安慶北門。倚城濱江。有菱湖。湖圓如鏡。稻田柳隄。周八九里。蘋藻芙蕖。映蔽水面。懷寧縣志。所載十景中之菱湖夜月者也。湖東北岸半里許。爲大湖水深過之。大亦幾倍。環湖皆山。負龍山。面菱湖。右倚北郭。左接大湖。巍然傑構。收覽名勝者。則今徐鏡溪團長之節孝賢母江太夫人祠在焉。江系出濟陽。祖籍青陽。僑居懷寧淶水鄉葉家嘴。世鄰徐氏。故爲昏母。十歲以童養歸徐承道公。逮事太姑翁姑。皆得歡心。翁顯耀公。兄弟五人居長。時太姑宋主家政。長幼二十餘。賴顯耀公率諸弟力耕。稍置田產。迨承道公成立分爨。僅得田種兩石餘。不足生活。則益力作不遑。當夏感熱染病。淹纏一載。母侍湯藥。衣不解帶。百計療治。竟不起。是年光緒甲申。母年廿七。鏡溪生甫一齡。其長姊五齡耳。母屢謀身殉。爲家人營救不遂。迺絕粒數日。夢承道公勸勿輕生。但教養兒女。後福當優於我。覺而異之。母父松發公諄勸。始稍稍進食。由是上事翁姑。下撫子女。日則親操井臼。夜則紡績縫紉。以所獲補贍事畜。庚寅。鏡溪八歲。母令就塾。家貧而學不輟。迄翁歿。家務集母一身。而境益窘。於是族人咸議。鏡溪

宜棄讀就耕。而長女爲童養媳於人。母執不可。仍督子就學如常。束脩無出。則率長女製女紅蓄雞雛。以所產貿植充之。已則恆忍凍餓。凡耕作輕役。輒自任之。其後長女適同邑路慶邦。路爲懷寧士族。翁兩臣公。宦湘有名。鏡溪亦遂成學。就仕者。母之一念堅定。始終不移成之也。戊戌。鏡溪年十六。母命入安慶府崇正義學。三年。辛丑。水災圩破。田廬蕩然。支蓬而居。採野菜觀音粉果腹。壬寅。入安慶惇典義學。學費雖免。而衣食所需。皆由母節嗇而得。母家故業儒。習聞庭訓。古節母教養孤子成名事。如孟陶歐岳諸母者。暇輒證引。誨語鏡溪。聲淚俱下。癸卯。鏡溪年二十一。應安徽武備學堂試。獲錄。時學校創設。咸鄙竊竊異議。母則曰。男兒爲國效用。科舉學校等耳。既肄業武備。月得津貼銀一兩。歸奉母。母則易物進堂上。老姑暨老父。而積女紅所得。增闢菜畦佐食。乙巳。鏡溪年二十三。入城應童試。縣試第二。府試第一。院試入學。親友咸賀。母而後喜可知也。而最鏡溪曰。我半生苦節。今汝幸獲一衿。稍慰汝父地下。然范文正爲秀才時。卽以天下爲己任。慎毋自畫也。迄鏡溪武備畢業。而其祖妣

亦於是年棄養。料理喪費。所得學校津貼外。仍以母十指所入佐之。母事翁姑至孝。雖貧力乏。病則求醫侍藥。晝夜不倦。歿則祭葬如儀。每清明省墓。雖客外必歸。躬詣致祭。察厝樞。葺茅蓋。疏溝渠。養生喪死。期於無憾。鏡溪歷任桐城天城學校。清江師範學校教職。並常備軍隊官。所得俸入。母不肯自費。出所餘周貧窮。或置田籍助家計。民國元年。錦溪任安徽軍政司總務科長。母恆以慎重民命爲訓。四年。鏡溪遊陝西。五年。赴察哈爾。六年。入北京陸軍大學肄業。八年。大學畢業。旋任安徽陸軍第三混成旅參謀。九年。任第二團團附。十一年。任第一團第三營營長。十四年。任第三團團長。鏡溪留學京師。及任團附營長時。歷駐當塗蕪湖。均就近迎養。十三年夏。赴合肥剿匪時。六安甫陷。肥城被圍。風警驚傳。遐邇皆震。母時在蕪寓。焦思三日夜未寢。焚香默禱。既而驅匪西竄。而母以憂慮得腹瀉病。十四年春。鏡溪赴婺源防堵。事略定。而贛常軍師復謀假道。百計籌畫。始獲繳械。所過安堵。皖以南賴之。而母病後焦慮。舊恙復作。是年秋冬之交。鏡溪奉令會師徐州。又煩慈慮。病乃加劇。旋赴江寧。

醫治稍愈。而元氣大損。以丙寅正月廿七日丑時壽終於家。享年六十九歲。孫三人。節孝事略。已於八年上聞。前大總統徐公。特獎褒章。並頒節勵松筠匾額。鏡溪乃謹遵褒揚條例。購地建祠。前大總統黎公。題曰徐母節孝祠。鏡溪以前過婺源。與謙有文字因緣。至是始具始末。請爲祠碑銘。有母如此其賢也。傳之其又何辭。謹爲之銘。銘曰。

菱之湖。荷菱香。節孝之祠何堂堂。餐貧級苦歲月長。撫孤致孝神慘愴。報福於善天不忘。有子爲世扶眞常。以儒爲軍禮義張。欲化貔虎爲馨皇。緊母之教何洋洋。吾傳母也歌且滂。願母歸佛生西方。寶池寶樹無邊光。中有說法師中王。母去復來。濁波滾滾兮爲之航。

中華民國丙寅季冬月。前江蘇教育司長。記名道尹。三等嘉禾章。世愚姪婺源江謙拜撰。

婺源八十二老人汪序昭居士生西記

淨土持名往生法門。操持至易。感應至神。其爲利益至大。夫脫輪回。生淨土。出凡夫。入聖流。此何等大事。而以南無阿彌陀佛六字致之。人不必賢智。愚夫愚婦得與焉。修不必久遠。一年數月。乃至臨終十念得與焉。故釋迦世尊之說阿彌陀經也。曰。一切世間難信之法。以其易也。又曰。一切諸佛所護念經。以其利益大而感應神也。夫人身難得。佛法難聞。聞淨土之法尤難。無論俗衆。有出家數十年而不得聞者矣。聞之難也。聞而起信發願力行者尤難。有初心奮迅。一年半載而中墮者矣。故雖易行之道。而非有大善根福德因緣者。莫之能焉。蓋無上甚深之義。任重致遠之事。寓之乎六字之中。以爲難。非真難。以爲易。非真易也。婺源大畈汪序昭翁。諱鳴球者。予母妻族也。以忘年交。予四十餘年。有所疑輒見問。有所獻輒見聽。予以己未自滬歸。養疴大畈。適其德配俞夫人喪。造予問追薦之法。予謂消業障。了生死。無如念佛。利濟苦趣衆生。無如施放餒口。翁唯唯。曰。自明日起。當督全家齋戒行之。於是全家子孫子媳孫媳十餘人。輪班值念。佛聲琅琅不絕者七日。翁治家故嚴。懈怠念不力者痛

責之。發俗久未知念佛薦亡之益。勵行之自公始。公家故貧。年四十債負未盡脫。以精勤貿易。三十年來漸爲富室。故制用甚儉。然自信佛後。次第興諸善舉。村中祖廟梵宇。橋梁道路隄碣之屬。一新。比年修路尤力。鄰村十數里間。皆成坦途。施貧乏。救疾苦。瘞枯骨。緣至輒爲之。又印送安士全書。印光法師文鈔。諦閑法師水懺申義。以八十壽將施食。請予爲之疏。曰。憶君曩語。當與此輩衆生結緣也。予曰。今當與西方阿彌陀佛結極樂緣耳。翁曰。能之乎。曰。是不難。信願行三字耳。翁曰。然則行難。曰。行非難。行苦行之謂。謂以持念六字慈名爲正行。隨緣隨力修諸善業爲助行。翁慨然肯之。因索翁累年所修善業。具疏回向西方。求與一切衆生同生極樂。自是翁供金色像持佛名號。晨夕寒暑無間日。而身心康健益加。嘗患足風疾不能行。聞佛光社佛七期。喜曰。予必親至。屆期果乘肩輿至。扶入場。初慮不能跪。予曰。無妨。但心作跪拜觀可也。旣而跪誦。移時又隨衆繞佛經行三匝。益信佛力不可思議。嘗與社友曹君雲喜約。我生西時。當來助我念佛。今歲足疾復發加劇。先逝前十日。禮延曹君到。

家助念。至十日。遂安詳而逝。志定神怡。頂溫體軟。具諸瑞相。家人聞堂中魚磬自鳴。又聞雅樂聲出入。皆曰眞生西也。翁遺命七七期中。全家素食念佛。辦祭款賓。皆用素淨。一一遵行之。翁子五人。今三孫八人。曾孫三人。多能紹家業。傳正信。其世福亦一鄉之盛云。予嘗爲讚佛戒殺詩偈數首。翁八十壽時。嘗印行之。以爲生日當素食念佛之證。至是其賢子孫續翁願。印予陽復齋詩偈集以貽世。因述翁生西始末附於後。以風觀者發心焉。民國庚午孟秋江謙記。

陽復齋文集 序跋類

雲灣孟蘭盆會誦經會序 江彥雍代稿陽復修正

吾村於歲之中元下元節。例有孟蘭盆會。及施食會。孟蘭盆者。其義法具載佛說孟蘭盆經。始於佛教目蓮追薦亡母脫苦生天。而一切衆生依法修供。得爲現世父母作福。并以追薦過去七世父母。蓋報恩之大者。施餓鬼食。則始於佛教阿難。然積久玩生。虛應故事而已。主其事者。既無齋戒之忱。僧道雜延。不問戒行。奚足以格神明。宏佛化乎。去年曾於中元節。舉行會事時。建二經臺於其旁。而邀皈心淨法之居士數輩。助之誦誦經咒。持念佛號。族老升初先生聞而善之。欲爲計久長。集村之樂善者爲一會。輪值行之。議成。屬謙爲言。以明其旨趣。謙竊管思之。吾蕭江氏自易姓分支。遷居婺土。蔚成巨族。歷數百載。其必有以致之者。如是福德因緣。可數典而忘祖乎。蕭氏之先出自宋。爲殷後。虞時契爲司徒。敬敷五教。布智慧之種於兆庶。爰啓成湯。用代夏德。解網宏愛物之仁。禱旱示憂民之切。雖以紂之虐而失民。而微子以其

仁猶延祚於宋。宋之宗臣蕭叔大心。以平南宮長萬功封於蕭。始爲蕭氏。嘗思大心二字。書傳無見。惟內典有之。意者當日於玄解已有聞與。佛法見於正史爲始於東漢明帝。然後儒考證所得。已久非必始於漢也。及漢鄧侯佐高祖入關之際。與民約法三章。盡除秦苛法。政澤之惠民者。既廣至其相業。清淨爲體。寬大爲治。尤稱盛焉。梁高祖以九五之尊。皈依淨教。聖仁之德。後世無及。昭明太子。仁孝性成。才思淵睿。尤精研般若。唐時八葉宰相。並無失德。史氏稱之。及吾族之奠居雲灣。以慕真禪師爲之下宅。而村中供佛道場。若松溪。若碧雲。若禮伽。若聽松。若凌雲。點石。彩虹。金竺。慈筏諸庵寺。又奠居後之先祖。布施佛事。廣種福田。以啓我後裔者。潛德幽光。不及備述。清鄉賢慎修公。學窺漢宋著述等身。晚年尤篤信佛氏因果之說。由是觀之。吾祖事蹟之顯著可考者。佛法未明以前。已冥符佛氏慈悲之旨。佛法既明以後。又與之有親切之關係。自科名采士。文盛道喪。所恃以弋獲之儒術。且未必實踐。何有佛法有藉以毀之耳。夫婦之愚。間有誠感昭著者。而未可以語法要。况以晚近潮流之鳴張。人失趨向之正鵠。益

將挾道德之藩籬而肆其放逸之行軌。無價寶珠。有目不識。而佛法日微矣。謙幸有宿緣。獲聞正法。已自矢於修持。並願同具法性衆生。咸證自心本覺。况世緣所締同源一體之族人乎。而觀今日鄉里情狀。不禁切切有憂者何也。今日村人富庶。已大遜於盛時。而習尚之敝。有愈趨愈下之慨。見微知著。防患未然。倡導佛法。有不容緩者矣。但以法王方便說法。義既無量。法亦無量。普而化之難矣。然佛法有頓有漸。頓者一卽一切。一切卽一。悟我法之同空。功超凡聖。通理事之無閼。果證圓融。漸者卽無量義之一義。無量法之一法。深信佛語。持而行之。六度萬行。積漸修習。亦足以植善因而增勝緣。頓者漸之成。漸者頓之基。是會組織之意。亦不求其頓而求其漸歟。且費簡而易集。事因而易行。效果可必。亦有數端。一者得經咒威神力之加持。與會衆生。業障深重者。得離惡趣而生善道。發願廻向淨土者。得脫輪回而生西方。二者廣場之中。凡聞法音。咸受法益。三者倡導鄉里。令知佛事之重要。四者本會同人。亦以是功德。成就淨緣。福不唐捐。抑又有要義。亦願因是告諸村人焉。朝菌不知晦朔。

螻蛄不知春秋。智有所限也。佛爲衆生慧命故。開示罪福輪迴三世因果之說。於理可信。於事有徵。執拘墟之見。囿迂腐之論。是爲深負佛恩。自斷慧命。則於因果之理。當深念也。輪迴因果。既能有信。當知當人歷劫以來之身。不可數量。當人歷劫以來之六親眷屬。尤不可數量。能必今之三塗苦趣。未嘗親受之乎。我身而在三塗中。其苦如何。我之親屬而有在三塗中。其苦復何如。而忍等閒視諸苦難衆生。不稍動其念乎。則於慈悲之旨。應反省也。海水雖多。經劫而涸。勺水供佛。功德不磨。經有明文。三寶靈感。見於記載。不一而足。人身難得。佛法難聞。衆生中有歷億萬劫。不聞佛號者。得人身矣。聞佛法矣。而靳於供養。慳於布施。聚九州鐵。莫成此錯。則於佛事布施。莫有疑也。大菩提心。以恆順衆生爲本。未能自度。而欲度人者。菩薩之宏願。金剛經言。有人用恆河沙寶。以用布施。不若受持金剛經四句偈。爲他人說。其福勝彼。衆生畢竟成佛。佛與衆生。非一非異。敬佛度生。其旨則同。佛爲三界慈父。禮拜諸佛。爲衆生報恩故。一切衆生皆佛子。救度衆生。佛本願故。則於宏法利生。應自任也。又有進

者。一切善業有染淨二種。染業謂作善以冀人天福報。古德所云。修福不修慧。終非解脫因。轉世以來。或以富貴淫其心。驕肆汨其性。易趨墮落。反速罪凶。淨業則不期於來世福報。而以出生死海。至涅槃岸爲止境。淨業多門。念佛第一。阿彌陀佛。以本願力莊嚴淨刹。其佛國土。無有衆苦。但受諸樂。名曰極樂。世間善男子善女人。以至誠心。持念阿彌陀佛萬德洪名。臨命終時。卽蒙阿彌陀佛接引。生彼國土。既往生者。親佛聞法。得與彼國諸大菩薩爲伴侶。永脫輪迴。終不退轉。畢竟成佛。若凡若聖。若智若愚。依信起願。依願起行。效應如桴鼓。雖餘業未盡。亦得帶惑往生。眞爲末世衆生修行無上之捷徑。則於一切有爲功德。更須以之回向極樂也。嗟夫。茫茫苦海。擾擾羣生。馳逐於名利之場。羈冒於貪欲之網。及至無常到來。精竭神疲。成績何有。業報不虛。祇爲三塗之預備。醒彼塵夢。示以覺燈。濟世慈航。厥唯佛法。淺識者。詆佛事之施設爲迷信。復以費財失事咎之。試問博地凡夫。費財何限。費時何限。匪爲無益。而又自貽之戚者皆是也。豈若起信歸佛。勉強布施。猶可爲死後帶得去者計乎。卽

以吾村神會言之。何啻百數。上焉者。藉以酬答神庥。亦不背報恩之義。但失所以敬神之道。下焉者。直徒餽餽爲口腹資。是真蠹財廢事矣。其不憚殘害物命。殺生致祭。不惟自誤。且以誤神。可不懼與。今是會同人。僅十有二。而族之六房均有與焉。則是祖先神靈之默啓。而佛法之觀念。猶影響於人心者。千里之行。始於足下。安知斯舉之成立。非吾族普徧佛法之機乎。是尤本會同人無盡之宏願也。

讀丁氏一切經音義提要書後

丁子仲祐成一切經音義提要。郵而示予。予讀之。辯矣。博矣。蔑以加矣。而尤契其論六書曰。聲之爲用。較形尤繁。洞哉斯言乎。夫形聲小學。乃古昔兒童之事。爲讀書通話之方。前清乾隆嘉慶間。諸子踵興。務爲宏博。白首專門。雖足名家。實乖本義。又多詳於形而略於聲。孔子傳易。孟子說經。劉熙釋名。皆略舉音聲。期通大義。至如形體假借無妨。唯六書義例。亦須觸類能通。夫是故古者施教之序。先聲而後形。先語言而後文字。內則所記六年教之數與方名。十年乃學書計。予意方名者方言也。劉熙

釋名一書。卽古方名之教之事。十年學書。而後及於象形指事會意諸聲假借轉注。許氏說文解字。卽古十年學書之教之遺也。六書之諧聲轉注假借。皆有聲韻之關係。不明聲韻通轉之例。則疑沮滋多。夫許書稱說文解字。說文主形。解字則兼形聲。讀許書者。知形而不知聲。則能說文而解字未了然也。聲爲先天形爲後起。未有文字。先有語言之聲音。既有文字。而所諧之聲。所假之形。所轉之義。皆聲音也。學六書者。知形而不知聲。則知象形指事會意。而諧聲轉注假借未了然也。朱子晚年。亦知聲韻爲經籍中一大事。自惜年老。不能致精。蓋古者訓詁之通。皆由音轉。如仁者人也。則爲同音。義者宜也。則爲一音之轉。庠者養也。則爲疊韻。禮者履也。則爲雙聲。亦爲同紐雙聲。同紐雙聲者。同部而一紐。禮履同屬舌部。而又同爲泥紐也。泝水者洪水也。則爲旁紐雙聲。旁紐雙聲者。同部而殊紐。泝洪同屬腭部。泝屬見紐。洪屬匣紐也。洪叢共聲。則泝洪古亦同紐。旁紐雙聲。是爲同部之通轉。泄泄猶沓沓也。則爲異部之混通。今讀泄音屬齒。沓音屬舌。而古則同爲舌頭音。易言以明之。則喋喋猶沓。

沓也。諧聲假借。其通轉多方。亦復類是。大抵同音易知。聲韻之轉難知。今韻易知。古韻難知。疊韻易知。雙聲難知。同紐雙聲易知。旁紐雙聲難知。腭舌齒唇同部通轉之例易知。異部混通之例難知。古者聲音之教。以口。口口之傳易知。今者聲音之教。以書。文字之傳難知。夫是故古者稱爲小學。兒童皆知也。今者以爲絕學。老師宿儒不盡知也。學之不講如是。夫予弱冠後。習英文拼音。而始有志於中國音聲之學。或昭或昧。或沮或通。積二十年。以賢聖之靈。而始有悟於天然聲母。與夫天然通轉之妙。證之經籍訓詁。而通驗之各省方言。異邦文字。而合試之野夫稚子。而知而凡文字所諧之聲。所假之形。所轉之義。皆豁然入吾範圍中矣。是演教通譯之喉唇。而一切經音義之筦鑰也。嘗講於天津上海江甯。錄存簡稿。而爲說音一編。舉其凡例。異日儻得同志之助。因慧琳希麟之書。尙當廣爲一編。以聲爲綱。博採而宏搜。條分而縷貫。使知數字一貫。皆由音轉。而文俗互通。方言互證。古今互訓。虛實互明。如舉一乾而健也。剛也。強也。堅也。固也。顛也。介也。庚也。金也。聲相屬也。義相屬也。舉一謙而歉

也。欲也。缺也。闕也。欠也。坎也。虛也。空也。聲相屬也。義相屬也。開卷了然。如指諸掌。庶省學子自學之難。而便按部取求之易。與許氏之書並脛而走。使幽沈之響。復出人間。蓄是久之。而病未能也。詩曰。嚶其鳴矣。求其友聲。微丁子載籍之博。而成書之勇。吾誰友乎。婺源江謙。

戒殺放生集序

慈悲愛物之旨。古今諸聖賢。啓信勸善。已至詳盡。世之昧者。囿於俗習。明者果於自信。斥正教爲異端。鄙仁道爲迂見。究之因果不爽。業報難逃。一治一亂。說者以爲天道之循環。不知古大德所謂欲知世上刀兵劫。試聽屠門夜半聲。承平之世。驕奢淫佚。已植其因。積而久之。必收其果。曾子所謂出乎爾者。反乎爾者也。當今時局。蝸蟻生民。塗炭羣然。屬望於世。所謂爲聰明才智者。以圖救濟。曲竈徙薪之不用。而焦頭爛額爲上功。不知種種政策。頭痛醫頭。腳痛醫腳。未能明乎癥結所在。詎有甚良之效果乎。夫放生戒殺。夫婦之愚與知焉。而士大夫以爲迂誠能平心靜氣以察之。則

知止沸抽薪不無善策。繫鈴解鈴還在當人。與其致力於科條之粗迹。反益糾紛。何如黽勉於飲食之幾微。隱增福德。戒殺實爲先務而已。往之愆非善莫贖。則放生尤爲重要。或自作或勸人。以增進善。因匪特可以消除災禍。且有不可思議功德。或獲世間之福報。或種出世之因緣。存乎其人耳。再進而人人能守十戒行十善。卽佛氏所謂人民以善業自衛。國家與今歐西之妄想民治主義固不同。同年而語矣。是則茲編之印布。自度度人。救世之福音。而又爲眞民治之嚮矢也。中華民國甲子孟冬
婺源江謙謹識

因果錄序

江彥雍代稿 陽復啓正

因果之說。非惟佛氏言之。中國古昔聖賢。垂教勸善。經籍具載。屢示斯旨。歐西哲學。家辨析事理。考求現象變化。當然之果。必有夙昔潛伏已然之因。亦不外於因果之義。科學家申明自然界物理之則例。應用於物質文明事業者。亦必根本於物理因果律而推斷之。但或言一物一事之因果。或言通於三世偏於衆生之因果。範圍有

廣狹。時間有延促之殊耳。夫種瓜得瓜。種豆得豆。與往來於六道輪迴。其因果之理同也。而井蛙不可語海。夏蟲不可語冰。知各有限。故能信於事物顯著之因果。而不能無疑於三世之輪迴。安足怪乎。庸俗之流。大都務於淺近。不特三世因果非所聞。卽其一生自爲計者。亦圖取快一時。鮮恤其後。蕩檢踰閑。災身敗家。不知惜也。其稍知自好者。夙聞聖賢之教。亦慄於善惡之戒。修德勵行。顧於三世因果之說。則以爲佛氏誘人爲善方便之權說。神道設教。未必實然。此實大謬。不知凡夫不昧夙因。知前世事者。時有其人。羅漢仙人。具六通者。均悟宿命。矧佛以大覺自能廣見一切衆生。歷劫輪迴之情狀。而垂示誥誡。寧有誑語爲教者乎。妄事謗佛。自招罪孽。何損於理之眞乎。又或賢智之過。喜談禪理。亦以無因果自詡高明。不知佛祖談禪。遮撥一切。意在去執。譬藥治病。權而非實。無病而藥。豈非顛狂。誤權是實。反生邪執。果其湛深禪定。心性空明。尙能迷復不遠。豁悟有期。否則妄持斷見。不信因果。衍弄狂慧。善逞機鋒。終亦難逃因果之報。無以自拔於輪迴。善乎華嚴之言因果也。曰。因該果海。

果徹因源。義爲最深矣。因之與果。一而二。二而一也。如形之影。如響於聲。無錫松鶴居士金君昌爲欲堅世人之信念。而慎於善惡之因也。輯近所見聞。并取前人記述。爲因果錄一編。簡要有法。有益於世道人心者至巨。今當世界劫運。天災人禍。累見叠出。仁智之士。或不吝財施。或力圖拯救。焦頭爛額。雖亦有救急之功。而尤在昌明因果之說。曲突徙薪。方爲上策。則金君此書。固救時之良藥也。余欽金君法施之仁。并陳因果之義。爲世之疑而未信者勸焉。婺源江謙謹序。

題雍正上諭平論三教後

清世宗通達三教之奧旨。而尤深於內典。故其言之平易洞達如此。可謂無偏無黨。王道蕩蕩者矣。以是爲制治敷教修學之準。又何疑焉。

慧茂齋跋

慧知一切法空。茂以繁興大用。智慧雙修。自他兼淑矣。滿是願。王舍取逕極樂乘。願再來曷由哉。法雨老人以勗費子。費子以勝其齋而屬謙題之。

題周少喬翁行狀

周子玲蓀襲從予南高師範學校任事數年頃其尊人少喬翁仙逝請爲題辭揚之翁勤儉成家教子成材而信佛然則玲蓀欲報親恩無如佛法脫輪迴生極樂此其福雖人天諸王無以過况世俗虛譽七七期中當茹素念佛祭唯用素親友來者但助念佛每念佛畢誦回向偈偈曰願生西方淨土中九品蓮華爲父母華開見佛悟無生不退菩薩爲伴侶若誦經咒則阿彌陀經往生咒可已 乙丑

題錦城族兄像

錦城族兄爲人經商所入非豐而好修橋路樂布施一鄉善士無過之者以是善因加持佛號求命終時得生西方極樂國土黃金爲地不假修築衣食自然不待經營諸上善人俱會一處精進無已直至成佛回今日因向他日果三十二相百福莊嚴如操左券而取故物若今繪像則因地中紀念而已 戊辰

題植棠家藏龍光公臨蘭亭手卷

昔人評右軍書隨文而異如蘭亭文心目中蘭亭也手中筆下亦蘭亭也乃至一點一畫無非蘭亭也族祖龍光公精書法爲鄉賢慎齋公高足弟子此卷亦殊有崇山峻嶺茂林修竹之致則信乎華嚴經所云一切惟心造者不虛也

程筱鵬居士弘化日記序

婺源鳳騰程筱鵬居士自歸心淨土發願弘化日必有所勸勸必有所記記之積半年矣將刊行之請謙爲序序曰佛光社成立一周年社友二百餘人丙寅初秋始得筱鵬筱鵬父志鵬先生故邑宿儒尊程朱而信因果樂施濟筱鵬幼承家學文筆雋美應紫陽存古學社試屢第一受知江湖嵐先生至是稟父命問佛於予予告以淨土之要佛之爲法也一切唯心自他不二圓解圓行利他自利而受以大慈菩薩勸修淨土偈偈曰能勸一人修比自己精進勸至十餘人福德已無量如勸百與千名爲真菩薩又能過萬數卽是阿彌陀筱鵬持是偈也歸而勸其家其村其鄰村一月而得信者百餘人適贛聯軍潰兵過邑比戶騷然徽屬六邑亦各有兵禍筱鵬來謀

於予。浩劫徧地。非佛莫救。將徧造六邑高明有力信望所歸之士。而勸設宣講部。昌明念佛戒殺持齋力善之義。以挽劫運而救人心。予乃歡喜稱歎。致請書焉。以重其行。筱鵬自是發鬢而休寧。而歛而黜。而祁門。便道還至。發凡閱時半年。行路一千餘里。通書九十餘函。勸進又三百餘人。凡黃山白嶽之區。縉紳縉素之閥。莫不造請而獲讚諾焉。善哉筱鵬。勞哉筱鵬。半年耳。而已信者如是之多。假而筱鵬發願復更累歲。而終身而窮劫。乃至無量無邊。而起信者又復各各如筱鵬焉。則化之所被。豈有量哉。豈有量哉。昔常精進菩薩。爲欲感化一人故。乃至歷劫相隨不捨。况多人乎。况一切衆生乎。易之贊坤也。曰。厚德載物。又曰。行地無疆。發菩提心者。其亦若是焉。書此以進筱鵬。并以告凡起正信發大心之善人。曷哉無餒。

書印光法師汪含章夫人往生記後

江謙謹按內子平日。事無鉅細。志願利人。而自受疲勞。甘儉薄。嘗所受怨。報之以德。嘗所受恩。則篤念不忘。蓋夙有淨因。當病篤時。誤服斂瀉。二便不通。腿足腫脹。不能

動屈。倏起倏臥。煩燥不寧。謙心慮之。恐亂大事。及夫深夜聞木魚聲。見金經光明行字歷歷。舉燭念佛。預告行時。自是神意寂定。不復痛苦。問者紛至。不爲動亂。至是遂得坦然禪坐而逝。非佛力加被。不獲此也。讀印光法師與體安和尚書。謂十餘年來。自西徂東。由北而南。往返萬里。其有平日自命通宗教。視淨土若汙己者。臨終多是手忙脚亂。呼爺叫娘。其有老實念佛。縱信願未極。瑞相不現。皆得安然命終。其故何哉。良由心水澄清。由分別而昏動。識波奔湧。因佛號以凜凝。所以上智不如下愚。弄巧反成大拙也。誠哉斯言。乃知阿彌陀經。所謂其人臨命終時。心不顛倒。卽得往生阿彌陀佛極樂國土者。因由早熟淨緣。亦恃冥加佛力。謹記證驗。以告同人。內子本字福和。印光法師錫之法名曰含章也。乙丑閏四月婺源江謙謹識。

慈悲水懺題辭

佛門最重懺法。猶儒者之自反悔過。內自訟也。湯之盤銘。卽三昧水懺義。特意該語簡。不若懺法之沈痛周詳耳。每焚香展拜。誦此一過。聲淚俱下。如久穢之軀。得一洗

濯卽時輕安竊願勸請同志推行懺法一洗國垢可乎。

墾荒說略序

中國地內部爲十八省而邊地爲東三省蒙古新疆西藏邊部地積與內部之比若二與一之比而邊部居二焉邊部人口與內部之比若一與四十之比而邊部居一焉內部之狹而人之稠如此邊部之曠而人之稀如彼然則移內之民殖邊之地政不以是而寧爲策乎內不移則生計日困邊不殖則外寇乘之而日言強內日言禦外夫誠不能使飢民自治而虛地自守也則空言曷濟焉今言保國則蒙必以保邊爲第一邊保而內固也言農業則蒙必以墾荒爲第一墾荒效速而改良效緩也言墾荒則蒙必以墾邊荒爲第一邊荒地廓適於大農而內荒地碎難於清理也言墾邊荒則蒙必以官以退伍之徵兵辦屯而商以公司之組合招佃爲第一法團力厚足以自保而因以保邊遊民勢散難於統治而轉以生亂也嘗以是語通州師範農科教員孫君孫君避之爲採日本成法著爲斯略以告當世自今以往吾願政府有

策。策殖邊也。議員有議。議殖邊也。農學者之所亟講。講殖邊也。地學者之所考察。察殖邊也。資本家之所投資。資殖邊也。舉國矚矚。萬目一的。邊庶其實而國庶其興乎。

新聞報三十年紀念序

世人競言法治國。而輕蔑道德。不知無道德法且不立。而況於能司能行。又烏能治。治烏能久。今且無論一國。但言一報館。滬之有報館。五十年來。出沒生滅者。且四百家。今其久而存者。惟申報新聞報。申報五十年。亦數易其主。新聞報三十年。則惟斐理思氏。叛之五年。美博士。福開森氏。承之。迄今二十五年。報紙銷數。且及十萬。爲諸報最。而始終經理其事。扶持而發達之者。厥惟汪君漢溪。人之稱汪君者。謂能以舊道德辦新事業。夫道德則烏有新舊乎。無道德則生存之不保。又何新舊之可言。予嘗叩汪君以持之久而行之廣之故。君謂有二義。其一。真正營業。公司有律。年有報告。有查帳。有分利。報每售一紙。必折本若干。而彌補之者。惟廣告費。今廣告收入。歲且八十萬。如是則內之本固。其二。絕無偏黨。無偏新偏舊。偏南偏北。偏朝偏野。偏甲

偏乙。如是則外之信昭。夫以經營之不正定而本搖。黨派之多偏歧而信失。一報館如是而況國乎。然則汪君欲以報救國救世。其知所擇矣。世人喜言新。然朝之新而暮舊。日之新而月舊。月之新而歲舊。新果何在乎。此生滅者也。有萬古而常新者。此不生滅者也。孔之切近。老之精微。佛之廣大圓滿。彼其所利。豈但一國。而其所救。豈惟一世。今新聞銷數。日且十萬。若以是宣傳之力。宏揚正法。於深夜之海樹之一燈。羣瞽之場立之一相。則脫險而得路者多矣。以是功德。將益使報館事業。至於可大可久之地。此三十之年。十萬之報。始基焉爾。汪君予同邑友也。因其請爲之序。兼以質正於汪君。民國十一年夏正十月。婺源江謙序。

諸經首章大義會編序

佛說諸經。經皆判爲三分。一序分。序述說經時地及聞經人緣。二正宗分。正演一經之宗旨。三流通分。結論傳經之利益。序復有通有別。通序諸經所同。別序本經所獨。儒家諸經。則於首章總括一經之要。大義炳然。學者熟復於心。深知其意。則於全經

之義。思過半矣。今時學人。廢經不讀。畏其深也。畏其繁也。夫經者正學之源泉。而聖賢之寶藏也。廢經則非聖蔑倫之邪說興。而殘殺流離之大亂作。可不懼哉。孔子之傳易也。曰易則易知。簡則易從。易簡而天下之理得矣。本茲聖訓。因集諸經首章大義。會爲一編。不能徧讀諸經者。熟此一編。如嘗海一勺。味具百川。若因是而進求全經。則此編爲之引矣。

歙邑羅守恆先生讚

我佛說法。多在叢林。倉聖造字。人木爲休。環境有天然之秀。美感自油然而生。入其鄉而童山濯濯。荆榛莽莽。吾知其教育之不講也久矣。善哉善哉。歙之羅守恆先生。弗尙虛榮。惟務實履。督兒輩爲農夫。樹模型於學子。鳩工墾荒。十年以來。樹億株矣。竹萬竿矣。農治而及工商。其餘事耳。夫山民大利。莫過於農。教育所資。首需實業。本生財之道。求社會之良。爲登高之呼。期衆山之應。則而傲之。吾於其鄉人是望。豈獨於其繼志述事之哲嗣哉。又豈賴崢嶸於文字哉。於戲。斯人可以愧世之號稱爲士。

而不知農工商者矣。

費範九居士印行羅蕙亭繪大士像誌

羅芳字蕙亭。南通高士也。善畫佛。小僅寸。大至盈丈。莫不莊嚴極致。顧不輕爲人作。世罕有知者。某歲平潮市盛爲燈會。四方觀者如雲。高士思有以引發其淨念。碾丹砂繪觀世音菩薩寶像三十五幀。運想殊異。張之琉璃燈中。光采煥射。如極樂國土。親見大士化身無量。而高士之畫。乃大有聲。高士故貧。生平無他嗜。一盡其藝於畫。先世有羅邃羅儒者。畫人物。州志方伎傳亟稱之。高士能傳其家法。而鬱鬱不得志以終。費居士慧茂。惜其遺作不傳。迺即燈會之繪。攝印永之。予聞之而歡喜讚歎。誌其因緣。

壽齊稿卿先生暨德配戴夫人六十文

齊子用修。與弟梅龢。旣得聞佛。歡喜踴躍。如入寶山。左攜右挈。囊之囊之。未有鑒也。造陽復子。請而言曰。明歲庚午。母年六十。又歲辛未。父六十矣。願得一言。歸而壽之。

陽復子曰。善哉。請也。子將何以壽而親乎。有性之壽。有相之壽。性之壽者。前乎無始。訖乎無終。包乎萬有。際乎無窮。佛無所增。我無所減。一切衆生。無乎不同。相之壽者。修短殊矣。無色頂天。八萬大劫。下而色界。下而欲界。如三界二十八天。壽命之數。降而遞差。皆累千萬。蜉蝣旦暮。螻蛄春秋。遂爲老物。壽斯下矣。人處其中。隨劫增減。增劫之壽。以福德增。壽亦如之。大較百年而增一歲。千年而十萬年。而百增之極者。八萬四千極。則必反。復爲減劫。福德減故。壽亦如之。百年減一千年。減十如是。遞減。乃至十歲。惶思修省。復入增劫。我史所載。天地人皇。羲農堯舜。乃至今日。正減劫也。五六十者。羣而壽之。概其中數。不越三十七八十者。或百或千。而一二焉。輪迴六道。况復無常。無色頂天。壽盡報終。還墮人類。乃至螻蛄。乃至蜉蝣。出入三途。俱未可測。因惑造業。因業受報。牽引纏縛。誰者自由。衆生如是。諸佛憫之。說出世法。不生不滅。其淨土乎。西方有佛。號阿彌陀。有淨世界。名曰極樂。七寶樓閣。寶樹寶池。瑠璃爲地。黃金界道。種種莊嚴。具如經說。不可殫述。佛以大願。普攝衆生。眞信切願。持念洪名。

報終見佛。卽生彼國。七寶華中。聞法授記。得壽無量。放光無邊。分身塵刹。普度有情。祇此一生。直補佛位。性壽相壽。圓滿一如。子將以是壽而親乎。復哉尙矣。爰爲之頌。
頌曰。

齊翁稽顙。恂恂而儒。以孝悅親。以謹持軀。瓶設家塾。名之友于。期於後哲。孝友詩書。憫學荒落。以經爲畚。濟貧卹老。何德之腴。孚於一鄉。其勤其劬。相彼陰陽。奠厥攸居。果實纍纍。林竹翳如。德配曰戴。溫靜委徐。佐夫事佛。卜慶有餘。宜其子孫。爲世寶珠。西方蓮池。壽阿僧祇。恩親會聚。永無別離。致親極樂。何孝如之。四十八願。佛誓無違。夙興夜寐。無忘大慈。
弟制江謙拜撰。

陽復齋文集 雜記類

敦復堂題記

癸亥十一月始構新堂。以年則貞下起元之會。以月則一陽來復之時。易曰。敦復无悔。象曰。敦復无悔。中以自考也。夫天地之復。自一陽始。國家之復。自人心始。人心之復。自孝弟始。人心之復。則天地之心復可見也。故曰。復其見天地之心乎。敦復无悔。中以自考者。內省不疚。反身而誠之謂也。若夫心性復於極樂。壽命復於無量。其諸敦復之聖人乎。以名茲堂。既以自考。亦使觀者自得焉。

慧犬記

犬白色。右耳微黑。狀殊衆犬。自其幼來畜予家九年矣。不妄吠。不穢食。家人有所戒語。輒聽從。若解意者。以丁卯四月初八釋迦佛誕日。無疾臥化於宅西小巷中。家人聞之。往爲念佛。視喪犬若喪一老蒼頭焉者。農友曹繩武。篤信淨業。任葬犬於村西溪南柳林之洲。自啓土成塚。皆誦念佛名。及往生咒。犬嘗有一巨骨梗喉中。咽吐不

得不食三日矣。謂必死。而予母爲持觀世音聖號數千。骨竟出。食如故。天下之犬衆矣。而狀若是。性若是。所遇法緣若是。逝之日。又若是。則豈可多得哉。斯犬也。而人其亦善士也。夫世人每輕犬。謂畜焉爾。然佛藏處胎經云。吾從無數劫。往來生死道。捨身復受身。不離胞胎法。純作白狗形。積骨億須彌。何況雜色狗。其數不可量。夫苟不發願歸佛。往生淨土。則不免輪回。則亦何所不生。計其多劫多生之簿。則於善而生。天生人生神。惡而生畜生。鬼生地獄之中。而獨以畜生。獨以犬生。獨以白犬生。積骨之數。且億須彌。何況餘犬。何況餘畜。何況其他之惡道。若種種鬼。若種種地獄。苦矣哀哉。生死之勞。而多欲之爲累也。吾輩之軀。然而爲人也。其亦不知何世何身。以何善力。會何善緣。而後乃今得之。若不修戒。還且復墮。若墮餓鬼地獄。犬之不若。而輕視犬云乎哉。江謙記。

丁卯秋節前諭兒

祖母大人意思堅定。佛且從之。我何敢強。念佛人隨時隨在。皆得保護。皆得安穩。兒

毋過慮也。祝願兩地皆得吉祥。此次軍紀嚴。聲勢壯。行走速。意不在小。殆欲乘皖垣之虛而入。飄風驟雨。不日當霽。靜以俟之。望請汝岳父母放心。勿念。並代我請安。賀喜。懇致謝意。

記舒載吾語

明時越中錢氏胎產祕書。龔雲林著。異人所授。子孫祕若家寶。至清康熙間。族裔竊出。遂有錄之付梓者。善化翁石洲於道光辛卯刊行。其孫蘭畦又於同治壬戌重鐫。撫閩使者徐宗幹序之。黟縣舒載吾君藏有鈔本。陽復子識。

愼修公弄丸圖題記

先賢愼修公弄丸圖遺像。其自題記。多明心見性之語。契合內典。後之題者。但以考據家稱之。非先生弄丸真諦也。歲甲子族姪孫植棠。以所藏舊圖請題。因記所見。以俟會通儒釋之大善知識證之。至於考據之學。戴東原稱爲鄭康成以後一人。洵非虛譽。晚年所著河洛精蘊。於河圖洛書易象。乃至術數諸家之學。靡不深究。尤多發

千古所未發。博通之士。世蓋有之。精密如先生者。罕其倫也。族後學謙敬題。

擬改曾文正公聖哲畫像記末後一段

自學者不明因果必然之理。而妄生貪求非分之心。方其咕嗶呶呶。則期報於科第祿仕。或少讀古書。窺著作之林。則責報於遐邇之譽。後世之名。纂述未及終篇。輒冀得一二有力之口。騰播人人之耳。以償吾勞也。朝耕而暮穫。一施而十報。譬若沽酒市脯。喧聒以責之貸者。又取倍稱之息焉。祿利之不遂。則微倖於沒世。不可知之名。不亦勞哉。夫商之貨殖。同時同。而或贏或絀。射策者之所業同。而或中或罷。爲學著書之深淺同。而或傳或否。或名或不名。亦皆有命焉。命者何。果是也。果必有因。古之君子。蓋無日不憂。無日不樂。道之不明。己之不免爲鄉人。一息之或懈。憂也。居易以俟命。下學而上達。仰不愧而俯不怍。樂也。自文王周孔三聖人以下。至於王氏。莫不愛以終身。樂以終身。凡以愼因而已。若夫果報。則釋氏通論三世之說。至圓至備。種瓜得瓜。種豆得豆。事將自至。而又何急焉。而如司馬遷者。傷悼不遇。怨怫形於簡冊。

其於聖賢自得之樂。稍違異矣。然彼自惜不世之才。非夫無實而汲汲時名比也。苟汲汲於名。則去三十二子也遠矣。將適燕晉而南其轅。其於術不益疏哉。

江謙謹按。曾文正公道德學術功業文章。皆當彪炳千古。後生小子。何敢妄議焉。而况塗改刪乙之乎。然以因果之說。通於萬有。互於三際。至真至實。佛老孔三聖人之書。皆因果之書也。惟佛通觀過去現在未來三世。理圓事確。一切業報。自作自受。非人所累。非天所偏。尤足使疑怨者昭明。而強梁者折服。三世因果者。經世之大法。而信因果與不信因果。又世間治亂之大源也。公特未詳觀釋氏之書耳。使詳觀之。將痛惜韓歐程朱闢佛之大謬。而深恨其擇言之未精矣。日月之食。人皆見之。白璧之瑕。不可掩也。公之聖哲畫像記。必傳之文也。而惜乎其闕因果一節。辭義乖舛。慮以是瞎天下後世正學之眼。而壯奸回之膽。予甚悲焉。誠愛公誠愛天下後世求學之人。與經世之大法。然則小子何敢讓焉。江謙謹記。

陽復齋文集 講演類

佛法之宇宙觀人生觀心觀

民國十二年在南蓮師範講

余數年多病。不能與諸生會晤。今得相見。非常欣悅。既難相見。所以今日略講諸生平日所難聞之言。諸生在校。日常習科學。對於佛之道。或不能有所致力。佛之道。原不易知。所謂人身難得。佛法難聞。佛法難聞有二因。一機緣難得。二真義難明。有此二因。故世之明道者不多。因而信佛者亦少。欲明佛所言。須先解決以下三問題。（一）宇宙觀。（二）人生觀。（三）心觀。佛之宇宙觀。人生觀。心觀。與其他哲學家所講者不同。佛法範圍廣大。其見地亦深遠。爲其他哲學家所不能及。

宇宙觀 字爲上下四方。宙爲古往今來。今人謂宇宙。大概指一地球世界而言。佛講宇宙。謂有十方無量數世界。十方世界者。卽此世界之東南西北東南東北西南西北及上方下方各無量數世界也。今日科學發達。謂天空中有無數星球。卽無數世界。近世天文家。并證明火星中有人類。其智識之高遠。遠勝于吾人。此猶據一推

十之談。若佛所言。則真語實語。非玄想可比。

人生觀 常人稱人生百年。實際尙不及。故謂人生七十古來稀。普通人之人生觀。卽此百年七十年而止耳。生以前爲何如。死以後爲何如。皆不能知。佛家之人生觀。則不固執現在。謂人生無始無終。此數十年。特不過一短時間。隨緣出現耳。至于前生之所由來。天乎。人乎。神乎。鬼乎。畜生乎。地獄乎。皆所嘗經過。而來世又復如是。前生之前。又有前生。來世之後。又有來世。故多生中必經過無數升沉。爲天。爲神。爲人。爲鬼。爲畜生。爲地獄。苦樂備嘗。而此後且莫知所屆。此等人生觀。若不明瞭。則不能信佛。

心觀 常人謂心在胸中。又謂人各有一心。佛家則謂身在心中。且不但我身在心內。一切人類之身。皆在我心內。卽十方世界。形形色色。萬事萬物。皆在我心內。十方世界之外。爲太空。太空之外。卽我心。故心爲無邊無際。其廣無外。其大無比。而宇宙人生。皆是我心現在之影。心是一大製造廠。天地萬物。皆此製造廠中出品也。常人

只知身內之心。譬之電燈。常人見此電光。以爲是屋內發出。再考察各家電燈。亦莫不然。遂自以爲真確。不知電燈之電。其來源實從總機關發出。彼等向未調查總機關之所在。故執此家屋內之燈。蓋其所見者小也。中庸天命之謂性。可謂得其總機關之所在。然猶非究竟之說。非先天之性。蓋總機關之電。不過電之一部分耳。空中無處不有電。故必知性是天命之大源。而後得佛之所謂大心。此則先天之性。易所謂先天而天不違者也。此心廣漠。常住而徧在。卽中庸所謂視之不見。聽之不聞。體物而不可遺。如觀世音菩薩。普渡衆生。同時十方世界。皆誦觀世音菩薩名號。菩薩卽化身無數。一一說法。一一救度。卽此一大心之所變現。常人之心體。與菩薩同。而心觀狹小。故體大而用小。其弊在執著我見。我執愈重。所見愈狹。只知一身爲其所。譬如一富家稚子。知囊有數金。而不知其家產之千百萬。蟻日行庭宇間。而不信人能日行百里。村人日居一室一村。足不遠出。只知一室一村之事。此外則不知佛家心觀最大。故其見地亦深遠。天地萬物。皆其心內之物。中庸唯天下至誠爲能盡

其性能盡其性。則能盡人之性。能盡人之性。則能盡物之性。能盡物之性。則可以贊天地之化育。則可以與天地參矣。余初讀之。以爲神話玄說。其實聖人不講假話。不說空言。及讀佛經大心之說。始知我性。人性。物性。天地之所以化育。只是這一物。所謂其爲物不貳。則其生物不測。故一盡則一切俱盡。佛家之大心。卽大乘。大乘者。大車也。蓋言天地萬物。無所不載之義。明此大乘心。則人我合一。萬物合一。人痛卽我痛。殺人卽殺我。不但如此。牛羊雞犬蟲蟻之微。莫不與我一體。故發大慈悲。大願力。以普渡衆生。

宇宙觀。人生觀。心觀。三問題。能漸漸明了。則知世間一切政治教育。皆準此出現。心觀大。則世界大同。心觀小。則世界戰爭。現在世界之所以紛亂如此者。卽由各個人之心觀狹小。只知有我一身。或一家。或一地方。或一國。而其所受之教育。亦無非限於國家主義之中。故欲世界和平。必須待世界人類之心觀放大。有大智慧者。不以國家爲界域。本佛家之精神。人我合一。萬物合一。世界教育。乃有大同之象。故世界

未來之教育主義。當爲世界大同之教育主義也。

又佛分心爲理與事二門。卽古人心具衆理應萬事之說。理者。視之不見。聽之不聞。心之體也。事者。心之表出者。卽天地萬物也。理與事如二門然。吾人能了解此理事二門。則學佛之途徑得矣。然研究佛學者。往往由於主觀之不同。對於理事二門。遂有取舍之各別。鄉村愚夫愚婦。頂禮拜佛。焚香許願。戒殺放生。卽由事門入者。文人學士。潛心典籍。研究大乘。卽由理門入者。由理門入者。可得慧。由事門入者。可得福。惟非事不足以顯理。不明理則事相執著。功德不圓滿。所以事理須相輔而行。而後得證圓果。具足福慧。其唯一之方法。卽從止觀入手。

止卽止我妄心。心本太空無物。易謂寂然不動者是也。外緣一切萬物。皆是忽生忽滅。種種幻像。以妄心執著。遂生種種倒見。是故學佛者。必須先要能寂止我心。然後能得觀照之用。易所謂感而遂通天下之故者是也。偈云「一念不生全體現。六根才動被雲遮。」金剛經亦云。凡所有相。皆是虛妄。若見諸相非相。卽見如來。見非相

是止。見諸相是觀。如卽是止。來卽是觀。如來者。止觀之謂也。大學謂「知止而后有定。定而后能靜。靜而后能安。」就是止。「安而后能慮。慮而后能得。」便是觀。就是先止靜而后能得觀照之用。修止則不迷於有。修觀則不滯於空。故止觀雙修。最爲中道。止觀雙修。卽理事雙修。亦卽福慧雙修也。

諸生學佛。有必須注意者。就是要福慧雙修。人生聰明富貴。乃極可危險之事。蓋聰明富貴。則謗佛非聖。作威作福之事。無所不至。惡既貫盈。立即墮落。是今世直接求聰明富貴。卽間接爲來世求墮落。所以生生死死。忽升忽沈。不知所屆。終是不了之法。永不能脫此苦海。有阿彌陀佛者。修成一西方極樂世界。不問衆生之程度如何。只要能念阿彌陀佛。發願往生。臨命終時。一心不亂。則可生其國土。阿彌陀佛。卽我之大心中的佛。吾人能深信切願。實行念佛。則可往生。及至極樂世界。則一切罪業。皆不會生。福慧雙修。直至成佛。人心本來清淨。因有雜念。混濁其間。如清水中混有沙土。根塵擾動。如沙土立起。水卽混濁。故必須用止觀的工夫。但在此娑婆世界。止

的工夫雖深。總不奈攪的人多。十年之澱。不奈一日之攪。若一入極樂世界。則其沉澱之沙土淨去。永遠不濁。再來救世。不入輪迴。不受任何環境所牽引。永永光明清淨。如我國之堯舜禹湯文武周公孔子諸聖人。皆自此中來也。難聞之言如是。如贈禮物然。我所贈者。諸生姑且收藏。不可棄却。他日感覺需用時。自然生大智慧。獲福無量也。

佛光社第一次社友大會演詞

江彥雍代稿陽復修正

諸法友同志。因宣揚佛化。利益衆生起見。有佛光社的發起組織。現在入社善男女。既踴躍異常。不但本鄉本邑的人。多樂於加入。還有異縣異省。甚至偏遠的省。亦有函請加入。由此可證明。當今雖屬末法時代。衆生對於佛法的感應機緣。尚可樂觀。本社現開大會。承地方官長惠臨。遠路到會的社友。亦不乏人。信願誠篤。極可欽尚。鄙人深幸觀成。略陳意見。願與諸君共同努力。更求精進無量。

佛法廣大。含蓋哲理甚深奧。不是少數語言文句。能夠發揮底蘊。社友同志。既贊成

本社宗旨及規章。對於佛法。當然有很深的信仰。也不用贅述多話。但是既有信願。更貴行持。知解不透。信願難堅。信願不堅。就不能行持有恆。故鄙人對於信佛的道理。也不憚煩。再稍說幾句。

佛是什麼。就是覺的意義。能自覺。能覺他。衆生是什麼。迷而不覺。隨業輪迴。不能自拔。法華經最要的四句云。「開佛知見。示佛知見。悟佛知見。入佛知見。」由此可曉得佛與衆生。就因知見不同。故有永遠的差別。開示悟入四時。實學佛人不可不知的要義。現在時髦學者。多自誇研究功深。好妄談佛法。以衆生知見。揣測佛知見。狂謬可笑。或招罪戾。倒不如世間愚夫愚婦。能皈依三寶。信奉佛法。多種功德。得佛神力加被。必有開示悟入的時期。佛知見。衆生知見。有怎麼樣的不同。精言義蘊。是不可窮盡的。而如金剛經上說的「我相人相衆生相壽者相」的有無。亦可爲佛與衆生知見不同的扼要語。試看世人。信奉種種邪說。以及塵俗擾攘的競爭不息。無非因爲知見中。這四種相不能消滅。生出許多的虛妄事業來。因果輪迴。永遠沉溺。

生死海中不能超脫。現在世界各種學說。好比百戲雜陳。街招遊客。但多是異端謬說。惑世誣民。就是一班自命爲學者的人。邪見更深。爲虎作倀。都由不讀佛書。不明佛理。譬如深夜行路。無明燈的引導。自然被鬼魅燐火所誘害。或誤入荆棘泥淖的裏面。古語云。一盲人騎瞎馬。夜半臨深池。一世間正學不明。邪說披狂的危險情形。正合這個譬喻。現在物質文明。雖云進步。但罪惡禍害的事更多。時局反益擾亂。人民反益困苦。國際國內的戰爭。如暗藏的爆藥。有觸即發。都是這些異端邪說蔓延的結果。欲講究根本的救濟辦法。只有昌明佛教。日煖冰消。燈明暗除。異端邪說。不辨自息。多讀佛學經冊的人。當能相信這不是虛誑的話。現在政治家民治的提倡。聲浪很高。試問研究民治成績的效果怎樣。仍是空中樓閣的理想。政治黑暗。暴民專橫。選舉運動的醜狀。黨派的傾軋。階級的鬥爭。以及國際強弱侵陵的劇烈。世界各國那一國能有真正的民治。不知惟有佛學昌明。方可有真正的民治。世俗的人。多以佛法爲出世的學問。偏於禪寂。不問人事。實是錯解。不知佛法。多談人事。大乘

更是普度衆生。能夠治世的道理。試以宋文帝與侍中何尚之問答證明之。「宋文帝問侍中何尚之曰。六經本是濟俗。若性靈真要。則以佛經爲指南。若率土之民。皆尊此法。則吾坐致太平矣。尚之對曰。百家之鄉。十人持五戒。則十室淳謹。千室之邑。百人持十善。則百人和睦。持此風教。以周寰區。則編戶億千。仁者百萬。而能行一善。則去一惡。去一惡。則息一刑。一刑息於家。萬刑息於國。洵乎可垂拱致太平矣。」五戒十善。已足爲民治的基礎。如果多人更能發大乘心。同抱普度衆生的誓願。還憂政治不致於善良麼。況且現受果報的苦樂。皆由自己業因造成的。不明這理。想盡他種逃苦趨樂的策。求避免水火刀兵的劫運。不可得的。就是見效。也不過頭痛醫頭。脚痛醫脚的治療。惟有皈依佛法。廣行佛事。可以消釀現時災禍。可種未來善因。是真正換凡骨入仙胎無上妙藥。由上所講的話。綜合起來。佛法可以度已度人。治地方。治國家。治世界。現在最急最要事業。沒有能過於提倡佛法的。提倡佛法。既有這樣的重要。佛光社當然是一種偉大的事業。却爲什麼組織在萬山重疊的僻邑。

之一村落裏。不是牛刀小試麼。但是照佛法的道理講起來。法界事業。本沒有大小的差別相。就是世俗萬般事業。也逃不出一作始也簡。將畢也鉅。的正例。本社組織成立。本意各盡力所及。宣揚佛法。很希望各村各鄉各縣各省。乃至各國。都能聞風興起。有這樣的組織。並不是如什麼商業公司。應得一市場。可專利壟斷一切。希望社友同志。不可自存輕忽的意見。振作精神。保持毅力。得宣揚一份佛法。就令衆生得一份利益。亦就爲自己種一善因。佛恩加被。同有功德無量。

本社因爲地處山僻。於當世博通佛法的善知識。不能親近聽受講論。故當今大法師大居士。如印光法師。弘一法師。尤雪行居士等。均由本社函請擔任社長社董職務。已得復信許可。自後社中如有佛法疑難問題的討論。可通函請求他們的教益。這是最便利我們學佛同志的一要務。

還有一段意見。奉告同志。未能自度。就想度人。修菩薩道者。應有這種發心。但是實事。還先能度自己。方可度他人。從非救人。是決不可能的事。所以我們同志。既抱宣

揚佛法的目的。自己必須切實學佛。救度自己。但是歷劫修行。是件極難的事。只有橫超三界。萬修萬人去的淨土法門。持念南無阿彌陀佛六字萬德洪名。臨命終時。可以超脫輪迴。往生阿彌陀佛極樂國土。爲現代末劫最契機最簡易直捷的妙法。諸同志應當遵信佛語。切莫遲疑。度已度人。宣揚此法門。與一切衆生同生極樂國土。

佛七圓滿日告同社諸友

江友潔記錄

阿彌陀佛處處接引

阿彌陀佛時時接引

今日佛七道場功德圓滿。諸友持名一心誠敬。具見信願之篤。曷勝讚歎。溯自本社草創以來。於茲四載。賴我佛接引之力。遐邇入社者。都八百餘人。然佛法如海。難以蠡測。則如諸友念佛數年。雖勤持佛號。深信淨土。然每以未得親見彌陀爲恨。謙當以二語爲諸友告。所謂佛七道場者。晝夜持名七日不斷。飲食睡眠。悉相輪換。此心除念佛外。別無所念。入場念佛。必潔必浴。六根清淨。不染一塵。先起七日。例須淨

壇道場四周。必繞誦大悲神呪。舉凡淨水所灑。香煙所薰之處。悉有道場神護法。外人不得闖入。如是七日。至誠所感。或可見佛。吾等今茲所行。特方便佛七耳。所以不得七日一心。皆由業障太多。至於念佛人。報身垂盡。得蒙接引。得託蓮池。如本社已故社友。漢臣先生。鎮頭辰午居士。皆是一心不亂。正念分明。捨報安詳。如入禪定。瑞相了然。此爲諸友所共知者。吾適言有二語爲諸友所不知者。今當鄭重宣言。諸友當屏息端坐諦聽。二語者何。曰。阿彌陀佛。處處接引。時時接引。請以太陽譬之。此世界有一四天下。其間有大香水海。海中一峯高聳。曰須彌山。日月二曜周轉山腰。自右而左。如經行焉。吾等居於南瞻部洲。故日行而南爲晝。日行而北爲夜。自東爲晨。至西爲暮。世人謂朝日東昇。夕陽西沒者。非也。須彌障之。有隱有現耳。如吾經行於佛座之南。而人皆見之。迨夫經行至佛座之北。而人皆不之見也。晝見日而夜無光者。須彌山爲之障也。若非須彌山之爲障。則晝夜皆當見日。可知日光無地不照。無時不照。若佛光普照。尤勝日光。業之爲障。有獨有同。有世界共同之業障。有一方共

同之業障。有一家共同之業障。有一人獨自之業障。譬如日行而北。南瞻部洲人不見。謂爲昏夜。而北俱盧洲人咸見之。彼且以爲永晝。日行南則北亦如是。同居五濁。同墮輪迴。此世界共同之業障也。次如一國。他國人或安居樂業。而我國人方顛沛流離。此一國人共同之業障也。次如一鄉。他鄉或值豐年。此鄉獨遭水旱。他鄉七甕無驚。此鄉刀兵擾攘。此一鄉共同之業障也。至同一鄉矣。鄰人屋宇軒敞。陽光充足。但有一家。居室湫隘。窗戶狹小。或且緊閉。終歲不見陽光者。非日光不我照。一家垣墉爲之障也。一鄉安樂。而一家愁苦。此一家共同之業障也。若同居一宅。宜若無別。乃宅中有一替者。獨不見有天日。匪天不覆。日不照也。彼目不明爲之障也。一家安樂。而一人愁苦。此一人獨自之業障也。吾等念佛。當如是想。佛本無隱。而人自障。人之以業自障。猶替者之不見日也。吾等只能勉行方便。佛七而不能七日。一心不亂。亦障爲之也。佛則無時不接引。流轉三惡道。歷經多劫。而今幸得人身者。彌陀接引也。入社念佛者。彌陀接引也。七日念佛。殷勤不懈者。亦彌陀接引也。乃至遠道來此。

參與佛七得如許人者。亦彌陀接引也。故曰。阿彌陀佛處處接引。時時接引。不待臨命終時也。阿彌陀經不云乎。阿彌陀佛成佛以來。於今十劫。然則四十八願接引衆生。寶手長垂者。於今十劫矣。諸友若能六根清淨。則生時可以見佛。一心不亂。則臨逝穩見彌陀。當知此時在社念佛。佛固念我。平時在家念佛。佛亦念我。行住坐臥。時時念佛。佛亦時時念我。乃至我不念佛時。佛則無時不念我。故云。阿彌陀佛處處接引。時時接引。諸友當知。人身難得。佛法難聞。淨土法門。尤爲優異。此身不向今生度。更向何生度。此身吾所以進此二語者。實欲發諸友之深信。促諸友之切願。篤行。吾今當重宣此義。更爲一偈。偈曰。

西方我淨土。彌陀我慈父。佛入一切心。佛在一切處。時時相接引。在在能遭遇。不怕佛不來。只怕我不去。

蒞安徽省立第二師範學校演詞

學生呂偉書汪振聲記錄

貴校爲吾徽教育之源泉。止澄先生又爲吾心所最欽服者。來遊之願。蓄之已久。乃

以病不果來。今由齊雲繞道來此。得此機會。歡聚一堂。欣幸何如。鄙人所欲言者。多散見於教育季報。無庸再贅。其實教育之要。不在說而在行。言論不過發表意思。而成就之效果。尤賴實行親證。如吾人高瞻遠矚。尤須步步前趨。積土成山。要在不棄一簣。若徒言而不行。終成畫餅。而實行之要。尤在於人所不見。大學曰。大學之道。在明明德。讀此語者。心之觀想各有不同。心無形狀。人所不見。大學之道。其要貴乎慎獨。所謂獨者。有相對的。有絕對的。相對的獨。即人所不知。已獨知之。中庸所謂「君子之所不可及者。其惟人之所不見乎」。是也。此猶有內外。有對待。有人見有我見者也。絕對的獨。即無人相。無我相。無人見。無我見。十方虛空。包括無遺。須知一念之動。即十方世界三世時劫。一切衆生禍福所關繫。故大學云。「堯舜帥天下以仁而民從之。桀紂帥天下以暴而民從之」。可知一切皆由於一念。一即一切。一切即一。如無線電此發彼應。一念之獨。固不可不慎也。常人初聞此言。嫌爲空虛。其實不空。果能開圓解。起圓行。於起心動念時。念念哀憫衆生。思救衆生。則此一念即與十方。

世界衆生同禍福。與十方世界之衆生同爲一體。孔子所謂「己欲立而立人。己欲達而達人」。見於事效。雖時有長短同異。而有感必應。理固不易也。吾少讀書時。有所念。後來在外辦事。却應前念。初以爲奇。研究佛理。始知心境一體。一切皆爲心造。皆爲心之幻現。譬有曠地於此。欲造房屋。必先起此房屋之心。房屋既由心造。則房屋卽心也。卽境觀心。心境不二。而房屋之大小高低。皆由心而生。貴校之造成。亦由此心之建設。而因緣湊合以成之也。夫心境既不二。則外人觀校中整潔與否。學生氣象如何。卽可由此而知內心之純淨與否。光明與否。蓋境由心所現也。知卽境卽心。卽心卽境。則心境打成一片。圓融自在。此在佛法謂之大乘。大乘爲車之無所不載者。大學所謂明明德。無對待。無障礙者也。所言慎獨。卽在於此。法華經云。「開佛知見。示佛知見。悟佛知見。入佛知見」。此知見卽絕對無待者也。佛知見與衆生知見不同。金剛經所云。人見我。我見衆生。見壽者見。此衆生知見也。由四見而有人。我衆生壽者之四相。凡所有相。皆由此虛妄分別而成。今日國與國爭。人與人爭。種種競

爭皆由衆生知見造成五濁世界。若能知衆生知見是妄。悟佛知見是真。則由衆生知見轉爲佛知見。此佛知見是圓融的一體的。絕待的是純真無妄的。今人執妄爲真。認賊爲子。不知彼所謂真。乃我佛所謂倒見。一切衆生皆由此種倒見。生種種倒行。受種種倒苦。欲祛倒見。在於息妄歸真。息妄非消滅也。悟妄是幻。不執爲有之謂也。明乎此。則同此軀殼。上至總統。下至轎夫行乞。而其中心量大小。不因地位而有不同。我此次因脚不能遠行。不得不坐轎。我看轎夫卽菩薩。蓋轎夫代我行路。猶菩薩爲衆生救苦。故轎夫卽菩薩也。可惜轎夫未開知慧。祇知索食求財。而仍在衆生知見之中。楞嚴經言持地菩薩。修橋補路。代衆負重作勞。此乃佛知見也。可知不悟。則衆生與佛有分別。悟則無別。中庸謂君子所不可及者。其唯人之所不見。卽指此知見而言也。悟佛知見。則師範生卽菩薩。卽大人。卽君子。不悟則徒爲文憑。不過爲小學教師而已。轎夫如此。乞丐亦然。金剛經云。『爾時世尊食時。著衣持鉢。入舍衛大城乞食。』佛之乞食。卽游化也。華嚴經淨行品。有言菩薩乞食遊化之事。可檢出。

讀之。卽知菩薩念念不忘衆生。著衣則願衆生具慚愧忍辱之思。出門則願衆生得大道去邪見。行乞便如如來行慈悲行。普度衆生。富者由前生布施而得此果。則勸彼布施。免墮餓鬼。若墮餓鬼。非特無飲食。且不聞其名。孟蘭盆經。目連尊者哀憫其母在餓鬼中。目連饋食其母。以手遮蓋。恐衆爭攘。飯忽變火。不能吞進。目連因此悲哭。求佛救度。佛乃教彼於七月十五。供養十方三寶。以此功德可出母難。孟蘭盆會卽本於此。是故佛教弟子乞食。欲化衆生慳吝之心。以救其苦。如是乞食卽菩薩也。我輩起心動念。不當僅爲救徽州救中國。要知各國皆在險中。待救孔殷。同種善因。自得善果。幸勿謂世界如此之大。於我無關。當知我卽世界。世界卽我。乃至十方世界。亦是我之表現。衆生所以不能如此者。實因起惑造業而得之報身所限。若念小則報身更小。如蟻之微。斷無日走百里者。莊子言「小知不及大知。小年不及大年。夏蟲不可以語冰。井蛙不可以語海」。卽此意也。故吾人須開圓解。潛發智慧。乃念念由解起行。方是大學之所謂。

明明德。方是大人之學。世法雖有階級。而心量大小。不因階級而分。悟則小學卽是大學。不悟則大學亦是小學。同作一事。而有衆生知見。佛知見之不同。廓然大公者。佛知見也。自營爲私者。衆生知見也。全在吾人自己參證。今不過借此機會。略談一二而已。

華嚴念佛三昧論發隱

在佛光社研究會講江寧惺記錄

今日所講。爲華嚴念佛三昧論。華嚴之華。讀如花。要講此論。必須明白一箇道理。大概佛法可以二語括之。何者爲二。卽一卽一切。一切卽一是也。在昔孔子和老聃。只謂一可生一切。一切從一而生。孔子所謂一以貫之。老子所謂一生二。二生三。三生萬物。至於一切中下一卽字。唯佛能之。此理唯佛明瞭。孔老書中。皆無充分發明。諸位以後研究。儘可以此二語做箇先鋒。去推測一切道理。華嚴中尙有二語。謂一入一切。一切入一。以一卽一切。一切卽一。所以一能入一切。一切能入一。現在我們佛光社是以修西方淨土爲宗旨。西方淨土者。爲十方淨土之一。念的阿彌陀佛。爲

所念一切佛中之一佛。求的西方淨土。爲十方淨土中之一淨土。何以教人專求一淨土。以雜卽無宗。專卽可成。末世凡夫。心量狹劣。若教以求生一切淨土。必如治絲而勢。莫知所之。故我佛教以求生西方淨土。專念一佛。生一土。狹見或以爲偏頗。殊不知念一佛求生一淨土。卽等于念一切佛。求生十方一切淨土。此卽一切卽一。卽一切之理也。何以言之。阿彌陀經言。六方諸佛皆讚歎阿彌陀佛。故知念一佛。卽等于念十方一切諸佛。又云。生西方者。常于清旦至食時。供養他方十萬億佛。供養一佛者。卽可供養十方一切諸佛。豈非生一方卽徧一切乎。我們學佛。是要預備將來救度一切衆生。有是大願欲救度一切衆生。故必須求生極樂淨土。何以言之。以未生極樂。尙在凡夫地位。有種種危險。真是朝不保暮。今生不保來世。何能救度一切衆生。如舉甕人。必須身在甕外。如救井中之人。必須身在井上。倘發救度一切衆生大願。而求生淨土者。謂之圓因。將來必得圓果。卽佛果也。若不如是。只爲箇人生死求生淨土者。謂之小果。羅漢聲聞是也。不植圓因。欲求圓果。將何可得。蓮池九品。

上品生者。於彈指頃。卽能華開。見佛聞法。中品次之。下品華不易開。須處蓮胎中數百年。乃至數劫。了不聞法。見佛。何以故。以疑生障故。經言。疑則華不開。我們研究會員。皆負有救度衆生的大責任。卽必須發大願心。求上品生。上品生者。見佛於須臾間。親蒙授記。得授記已。三身四智。五眼六通。無量百千陀羅尼門。一切功德。皆悉成就。然後卽可不違安養。回入娑婆。分身無數。徧十方刹。以不可思議自在神力。種種方便。救度衆生。欲種圓因。免除疑障。舍念佛正行外。須加助行。卽觀經所云。求上品生者。須誦大乘經典。大乘經中。復以華嚴爲最圓滿。故彭際清居士勸念佛人求上品生者。須持華嚴經。因著華嚴念佛三昧論。華嚴經是龍樹菩薩從龍宮中記出。有上中下三本。上中本非此娑婆世界凡夫所能受持。上本有十個三千大千世界微塵數偈。有一四天下微塵數品。中本次之。此二本者。皆諸菩薩以陀羅尼總持力持之。陀羅尼總持力者。能于一刹那間。入一切世界。於一切佛前。同時聞一切法。皆悉受持無遺。下本卽龍樹菩薩至龍宮記憶來者。亦有十萬偈。據云。印度某國有藏。

本震旦流通者。乃印度大德。至中國所譯。謂之下本之略本。自晉至唐。經四次翻譯。成八十卷。在中國流通之佛典中。應爲最巨。以其繁故持者少。彭居士曷爲以此繁篇巨帙。勸修淨土人持誦。然實有莫大之理由。華嚴卷帙雖多。倘能通之。成功卽甚速。以其該一切理故。喻如他途。雖五里一亭。十里一村。然徑路紆曲。距佛途遙。欲達彌艱。華嚴雖百里始有一站。然路途坦直。達之甚易。佛法分頓漸二門。力小根鈍者。必須五里一休。十里一憩。至若力足根利者。雖百里可一奮而達。一聞佛法。卽可語以至圓至頓之理。漸法卽以之接引小乘。何以謂之乘。乘猶車乘也。佛講人天乘。勸人修善去惡。免墮三途。備將來生人天中。故謂之人天乘。更進謂之聲聞乘。修淨去染。人天雖有小福。仍屬染法。不免輪迴。故聲聞回染向淨。再進乃菩薩乘。須發大心。救度衆生。乃回小向大。華嚴則爲一乘之法。大猶對小而言。一乘卽無所謂大小。圓融無礙。故修淨土者。能誦華嚴。卽種圓因。因既圓。果自無不圓矣。今將華嚴與淨土觀念不同之點略說之。修淨土者。乃念阿彌陀佛。求生西方極樂世界。持華嚴者。乃

念毗盧遮那佛求生華藏莊嚴世界。毗盧遮那佛。卽是釋迦牟尼佛。毗盧遮那之義。卽種種光明遍照之謂。在密教謂之大日如來。其說謂毗盧遮那。乃太陽之別名。太陽雖光。尙可障礙佛光。卽無所障礙。太陽能耀晝不能耀夜。佛光卽無分於晝夜。太陽僅照一四天下。佛光遍照十方。此其不同也。故稱大日如來。釋迦牟尼佛。乃此世界之名號。實則徧一切世界。皆有釋迦牟尼佛。但各各名號不同。不同之故。亦爲隨順衆生機感耳。

何謂華嚴莊嚴世界。華嚴云。十方世界海。有大香水海。海中有極大蓮華。爲金剛百寶所成。華藏世界海。卽在大香水海蓮花中。卽毗盧遮那佛佛土。猶此娑婆。乃釋迦牟尼佛佛土也。此世界海一百一十個世界。種種者。形其世界之多。每世界種各有二十層。每層中皆有恆河沙數世界。此娑婆世界。在熾然普光明世界種之第十三層。誦華嚴者。先須將此觀念印入腦海。各各世界種皆有名字。避繁不說。大凡一切衆生之病。病於心量狹劣。此經至圓至頓。至大至詳。讀之心量自能廣大。此大心卽

是佛心。是衆生本具之真心。經言心佛衆生。三無差別。卽一而三。卽三而一。欲開佛知見。須先將此心本體認明白。而衆生之不識本體。輪轉六道。都由執我及我所。執此四大六根爲我。凡父母妻子六親眷屬。以至田園房舍山河大地。我所有者。謂之我所。此執不除。本體何能顯現。能認本體。卽全部華嚴十方一切諸佛。乃至十方一切菩薩羅漢。聲聞六道衆生。皆是此心鏡中幻出影像。此觀若明。看一切經。自可了了。不由師悟。卽可明一卽一切。一切卽一。亦卽可知一能入一切。一切能入一。不惟此娑婆世界有釋迦牟尼佛。卽十方世界無不有釋迦牟尼佛。不唯此娑婆世界有觀音普賢文殊地藏。卽十方世界無不有觀音普賢文殊地藏。譬如一月麗天。百川影現。池中溪中湖中海中皆有一月。雖至一掬水中。亦無不有月。昔清涼國師有一妙喻。謂如月印澄江。羣舟四發。東行者見月亦東行。西行者見月亦西行。南行北行。亦復如是。不行者見月亦不動。此觀若明。卽於一切佛菩薩隨衆生機感。各各應現。可豁然無疑矣。如釋迦牟尼佛于四月八日在印度淨飯王宮降生。而某年出家修

行。某年成道。某年涅槃。華嚴則三際圓融。同此一時。釋迦佛在此世界降生。在他一世界卽爲出家修行日。在他一世界又爲成道日。在他一世界又爲涅槃日。於同一時在各各世界示現不同。此卽清涼國師江中行舟見月之喻也。我等在凡夫地。誦讀大乘。研斯妙諦。乃藉以開悟圓解。爲求上品往生耳。證則未能也。生西方後。則能於一食頃。供養他方十萬億佛。故知念佛求生西方極樂世界。未可忽也。况生一生多。本無有別。觀于上說。應知生一極樂淨土。卽等生於一切淨土。既往生已。卽可不違安養。回入娑婆。分身徧一切處。度脫衆生。

凡夫與諸佛體同。而用不能同者。實爲有此形骸。形骸之來。原於業識。業有善惡。故根有利鈍。則如社友中根基之利鈍。識字與不識字。亦至不等。根鈍而不識字者。只須單念一句阿彌陀佛。永明大師謂但得見彌陀。何愁不開悟。既生已後。何所不知。第品位有高下。華開有遲早。見佛有先後之不同。故勸諸位社友。利根識字者。須加持大乘經典。印師文鈔。謂華嚴法華圓覺涅槃。楞嚴般若。諸大乘經。須循環誦念。然

此六者之中。復以華嚴爲至圓至頓。故持華嚴者。生極樂時。必能得上品生。卽時華開見佛。既得人身。既蒙佛光。既知華嚴。卽幸毋自後。願與諸君共勉之。(未完)

救火須知 壬戌年寓滬作

一 先事預防

滬上商塵稠密。火災迭見。根本救治。在正人心。凡爭鬪殺害心。嫉妒瞋恨心。邪淫心。皆爲心內之火。災火之來。由心火生。內火不生。外火不入。對治之法。以博愛戒殺放生心。治殺害心。以和平心。治瞋恨心。以清淨心。治邪淫心。如此必能感佛格天。消災獲福。更能常恭敬持念觀世音菩薩名號。則災難自息。常念地藏王菩薩。則家宅永安。常念阿彌陀佛。則業障自消。

二 臨事施救

或自宅。或鄰居。或見光聞聲之處。無論白晝深夜。不可驚亂。除方便施救外。但至心持念南無觀世音菩薩。心想觀世音菩薩在虛空中。手執楊枝寶瓶。以大悲水灌至

火所。火卽熄滅。須知菩薩神力。不可思議。衆生念力。亦不可思議。至誠而不動者。未之有也。更能許願作功德事。尤爲有力。

三 事後覺悟

一。諸惡莫作。衆善奉行。二。須知吾輩所居世界。名爲娑婆。惑業滋多。苦難具足。此世界自體。尙不免成住壞空之四劫。當壞劫時。七日並出。海水涸竭。大地火起。上至初禪天宮。燬爲灰燼。故佛言三界無安。猶如火宅。故當常念阿彌陀佛。發願盡此報身。求生西方極樂國土。命終之時。求佛接引。蓮花化生。得不退轉。直至成佛。還至娑婆度脫衆生。然必平日深信切願。行止坐臥。持念不忘。方得臨命終時。一心不亂也。見者聞者。幸共勉之。

記者寓上海海寧路天保里三號。臘月十四夜半。鄰近火起。記者舉家持念觀世音菩薩名號。並千手千眼大悲神呪。旋即救熄。未至蔓延。書此廣告。上報大士之恩。所望有情。同發生西之願。壬戌臘月祀竈日。陽復子江謙敬識。

江灣蕭江宗祠內設佛光社之說明

頃者佛光社同人以建設社舍地址三處請示於佛。皆未得可。復加祠堂樓一處。共爲四圖。請示於佛。得祠樓圖。佛理廣大。人不易知。事關大衆前途幸福。請分條說明之。

一當知佛爲三界大師。四生慈父。衆生或有不知佛。佛無不念之衆生。佛在諸天宮說華嚴經時。天帝天王皆以帝座供佛。而自居旁座。故佛稱世尊。爲世界之最尊也。二當知我蕭江自周蕭叔大心公漢鄼侯何公皆以仁慈救民定國。故世世爲貴族。至梁武帝大宏佛法。御殿講經。祭用蔬素。在位持齋五十餘年。享壽八十六歲。膺帝位者四祚。子孫爲唐宰相者十人。其八人皆昭明太子之後。昭明太子天性仁孝。精於般若諸經。親斷天下疑獄。所全活者無算。故後裔尤昌。今我蕭江子孫皆昭明之後裔也。顧公退隱篁墩。董公遷居婺源。皆世崇佛法。江灣一村舊有六庵。皆延高僧住持。非信佛人多。何能如是。可知我蕭江列祖列宗於佛法最爲親近。而今則衰矣。

三當知今日世界殘殺之劫。非佛莫能救。日本憲法。全國臣民皆須歸敬三寶。人家香火龕中。皆中供佛像。旁列祖先。暹羅全國自太子以下。皆須出家學佛法三年。或一二年。然後還俗成家。其國風調雨順。年穀常豐。故暹羅日本。國小而皆強。近年歐美信佛法者。歲有增加。英國已數萬人。其佛學報銷數至四十餘萬之多。可知佛法不久當遍世界。此後世界之最新潮流。必自佛海中來也。

四當知今時災劫之重。遍處皆是。旦夕堪虞。一切生命財產建築等物。非佛法莫能保險。前年樂平匪災。比戶搜殺。唯佛光社社友數家。匪獨過門不入。今年婺北黃村被匪。全村遭掠。獨黃耀庭居士家。樓供佛像。其前後門皆臨大路。匪獨不入其家。耀庭居士亦佛光社社友也。可知新祠內設佛光社。樓上中供佛像。左右供蕭江歷代祖先。不但能保一祠一族。實能保全一方。至於每月十齋日。開會念佛。每年春冬二次。佛七道場。祖宗族人。陰受其福者。非淺。肉眼不見。故不能知耳。

五當知新祠若專爲春冬祭祀之用。則關閉終年。易於霉朽。香火冷落。供養無人。若

內設佛光社。則每月十齋日。及佛菩薩誕日。皆須開會。供養禮拜。念佛誦經。不唯祖先之冥福。因之加厚。卽祠宇之壽命。亦因之延長。

六當知我族既系稱蕭江。則當保存梁武帝昭明太子宏揚佛法之家風。永傳勿替。明時族中秀士往金陵應試者。如一鵬公等。皆須親至丹陽拜掃武帝陵墓。一麟公修復禮迦古蹟。延請眞柏眞松二師宣傳佛法。故人文蔚起。族姓繁興。今新祠設佛光社。中供佛像。正以追繼武帝昭明太子及一麟公諸祖遺志。永訓子孫。致孝修慈。我族前途之幸福。未可量也。

以上六條說明。關係皆殊重大。謹抒知見所及。願與同族諸君子商之。 謙再拜

教練團防要義與劉縣長書

一選良民 一鎗一彈。良民用之。則爲地方之福。莠民用之。則爲地方之禍。此意須與各區公正紳士詳言之。令其負責選擇保薦。不得保非其人。

二先邊地 邊地與匪爲鄰。教練有備。則匪不敢入境。故須先招與德興開化樂平

浮梁接近之各村農民教練之次及通衢次及富村通衢行旅最雜有備令匪怖威富村匪所垂涎有備令匪絕望

三禮大士但教各戶常念南摩（譯言歸依）觀世音菩薩聖號事易而效神昔黃巢所過屠城至杭州時錢王方爲杭牧虔禱大士巢兵仰見大士現身虛空棄杭而去滬上佛學書局印有觀音靈感近聞錄因禮大士而得免匪難者尤多

四戒殺生刀兵之禍皆因殺生食肉而來今國難當前災荒遍地蔬食菜羹已爲幸福豈宜食肉殺生增加罪戾本身作則自縣署始不以肉食款賓尤當嚴禁殺牛違者處罪

以上四端實爲要義孟子曰仁之勝不仁也猶水之勝火又云仁者無敵此當深信不疑者也敬寫以呈倘蒙高明採納幸甚幸甚江謙再拜

與劉中盛縣長書

前上教練團防要義四條度達尊覽頃思尙有一事則就地教練是也教練要選良

民良民多有職業。令離職業而入城聽受教練。彼勢所難。若就隣近匪區各要口。設教練處。而招附近村民。令受教練。其勢則易。且就地教習防守之法。則地勢易明。就地演習禦匪之方。則建威尤速。是否切當。幸裁定之。江謙再拜。

陽復齋文集 哀祭類

祭清例贈奉政大夫蕭江三十二世興瀚公八十冥壽文

惟公誕生道光乙巳迄今甲子爲壽八十公之大願啓後承先孝友義行以爲莊嚴翼翼支祠勝曰贊義公實創之以忝先祀纍纍先塋未安窀穸跋涉山川求之以德屢獲佳城唯公之力敬教勸學熟於史編先哲往行言之便便扶植後起但云其賢親愛啓迪如自出然先產義田創爲族學後秀莘莘蔚然明效公早棄養未報慈恩茲當冥壽追憶音容諷經設祭如公之存庶幾感格以庇後昆德配汪氏與公同歲繼配王氏晚公十歲並爲冥壽與公合祭虔念彌陀邀佛之光惟公惟妣同往西方國土極樂壽命無量竟成佛道爲世慈航稽首祝願明德馨香尙饗

祭先考晴舟府君文

維中華民國十四年夏曆乙丑歲十一月朔日甲戌之辰不孝男謙率孫厚生曾孫世英等謹以齋供冥衣楮帛蠲錠之儀百拜致祭於新逝先考蕭江三十三世府君

諱邦濟公之靈前而言曰。嗚呼痛哉。兒不侍父。二七於今。慈容邈邈。兒淚潄潄。父生而孤。孝友慈仁。不假追琢。粹然本真。孝親尊祖。字幼矜貧。等他于自。撫疏若親。終日積慮。曰。惟救人。天寶鑒之。肫肫之心。六月十九。父生之辰。豈伊大士。示現化身。孫曾繞膝。壽邁古稀。考終善逝。父報則宜。琅琅佛聲。見佛何疑。自兒龔稚。惟父之依。教兒遠大。謂兒庶幾。弱不努力。慚淚如縻。兒年五十。知非尙非。父棄不責。兒寧勿悲。父則勿悲。世會終離。西方極樂。寶閣參差。菩薩爲侶。彌陀爲師。精進不退。成佛爲期。兒之聞法。父教之貽。凡諸福善。毫髮無遺。爲父資糧。助生蓮池。十方三寶。攝受證知。瀝誠致祭。父尙饗之。嗚呼哀哉。

代義成作祭文

嗚呼痛哉。不肖兒均福。不見我母。三七於今。心與日馳。悲傷何極。衣食作息。隨在增悲。飲水思源。無母曷此。當父逝日。家無宿糧。賴母劬勞。以有今日。音容憶念。涕泣隨之。愧兒頑軀。操作供養。未報深恩。而母難待。孫與曾孫。爲母所愛。一去難顧。苦哉別

離報母深恩。如天罔極。計維佛法。能度生死。能超苦海。能達樂邦。謹遵聖訓。持齋念佛。施食度生。以此功德。資母七寶池中。花開見佛。親聞妙法。悟證無生。永蔭孫曾。普度含識。無盡願忱。惟母慈鑒。謹獻齋祭。神靈格之。嗚呼哀哉。尙享。

祭汪游外舅母老人哀辭

人生八十稀中稀。故家極樂胡不歸。聞赴急稱三聖號。求佛攝受生蓮池。母於世法無譏違。勤儉賢明孝且慈。憶佛翹勤亦半載。往生有願今其期。夜夢道場光澈屋。光中花影紛霏霏。又見瑠璃碧樓閣。金文蜜綵何精微。信知瑞應不虛現。當脫敝服披珠衣。海會重逢靈照女。自今歡聚無此離。鑪香一炷列齊筵。母靈來兮尙歆之。永庇孫曾利含識。作大福德無窮時。

祭祖母詹氏太夫人百歲壽文

祖母之生。道光戊子。迄今丁卯。蓋百歲矣。祖母之逝。光緒丁未。享壽八十。復廿年矣。惟我先祖。仁孝哲儒。祖母配之。德若合符。豈期英年中道而別。遂矢柏舟。耿焉清節。

上事二親。下字二孤。伯商承業。仲讀遺書。爲育爲壽。其勤其劬。澍與謙樾。逮侍祖母。言語動止。導以規矩。教之端重。教之儉勤。教之禮敬。教之和親。朝暮馨香。以奉三寶。盲啞孤寒。敬之如佛。飢爲調食。寒爲蓄衣。恤疾拯苦。孰如其慈。祖母之儀。家邦之則。子孫世世。念之罔極。今茲百歲。紀念尤肫。伯父我父。並離世塵。無以報恩。惟祈佛力。念佛誦經。施佛經籍。回向先靈。同離火宅。同侍彌陀。極樂之域。潔齋致獻。庶幾來格。庇蔭子孫。永綿祖德。烏庠尙享。

代長遠作祖祭舅母文

於維舅母。慈心懿德。積厚流光。體歸窈窕。靈往西方。裕後利生。福蔭無疆。甥等思慕。祖祭道旁。伏維歆饗。

起發祭文擬式

嗚呼哀哉。不見吾母。七七之期。靈歸極樂之邦。體卽永安之宅。惟中平之吉壤。實天錫之佳城。形如大士。坐彼蓮臺。環視四山。圍如海衆。歷千秋而綿萬祀。昌厥後而利

衆生靈輻將發。齋祭虔恭。伏維歆饗。

成主祭文

自吾母之棄養。欲隨侍而無從。惟不匱之孝思。將永依乎廟貌。茲值良辰。既成神主。仗佛天之庇祐。綿萬祀之馨香。靈爽攸憑。瞻依如在。齋供致祭。伏維歆饗。

請主入廟祭

於維慈母。七期甫滿。葬事幸成。天相吉人。永安窀穸。既成神主。如接音容。安奉廟堂。隨從昭穆。馨香萬祀。瓜瓞長綿。茲值良辰。供陳堂祭。伏維歆饗。陰祐無疆。

祭先母汪太夫人文

無常生死。娑婆無不散之因緣。罔極慈恩。高厚猶倍蓰於天地。追懷母範。既慕且悲。溯吾母之來歸。猶逮事先太祖妣與先節孝祖妣。以及相先君育諸子。備極勤勞。婦德母儀所應盡者。艱辛備歷。而和娣姒睦鄰里。處人接物。人倫日用之常。亦無不悉循理義。早歲信佛行善。晚年獲聞淨土之法。修持尤力。日課佛號萬聲。多至數萬。廣

行功德。以爲淨土資糧者。不可勝記。往往乞丐至門。必先諄諄教其持念阿彌陀佛。洪名。然後施以財食。其在佛法。則事兼財法二施。其在儒道。亦已立立人已達達人。菩薩心腸。仁者行事。享年七十有八。繞膝孫曾。人間之福壽全備。捨世之時。身心泰然。無諸苦惱。西向端坐。一心念佛。更有合家及諸淨業善友之佛號聲聲。以成母志。過五時許。頂溫已冷。肢體柔軟。容貌如生。證之生西諸福相勝緣。則決定往生可必。不孝男早披儒服。所學無成。中歲以還。幸承母教。矢志念佛。信願雖堅。而朝夕修持之功。愧未能希母之專一。母今往矣。報恩何及。世間之孝。僅止於葬祭盡儀。惟有最出世之法。信願念佛。更求精勤。庶不負吾母鞠育之劬勞。猶可永侍吾母於蓮池法會之中。以酬深恩於萬一。並願以十年來念佛持經。乃至自利利他一毫之功德。悉以回向吾母。以期增高蓮臺之品位。自母生西。倏然二七。謹供齋筵。冀成法味。十萬億刹。一念而至。母尙饗之。慈光普被。

宏通孫祭祖母汪文

唯祖妣享壽五十兮。方喜慶乎弄孫。豈憶生甫彌月兮。覩靈駕之西巡。雖呱呱未能
言兮。期長大而報恩。當三七而致祭兮。願臨格如生存。嗚呼哀哉。尙享。

陽復齋文集 疏類

五十生年供佛懺罪施食度生瑜伽道場疏

伏維釋迦文世尊。以四十九年演說正法。而指歸西方。阿彌陀如來。以四十八願攝化含靈。而逕超三界。消災延壽。則東方藥師如來。放瑠璃之光。接引生西。則觀音勢至大士。奉金蓮之座。十方三世三寶。同體慈悲。九界九品衆生。齊登蓮岸。罪苦衆生。淨業學人江謙。自初不覺。頓起無明。三有僑居。四生幻相。以歸戒有漏善業。幸獲人身。承祖父師氏薪傳。習知文字。雖讀聖賢之訓。實慚踐履之功。始則修詞小技。浪擲清明。繼則憂國時趨。謬同邪見。譬之敝筏渡人。渺不自他俱溺者已。如盲導盲。以苦濟苦。雖願深如海。而罪積如山。聖賢之所悲憂。諸佛久焉憐愍。賴以病苦。而得幽閑。歲在戊午。節當冬至。值一陽之來復。發三世之奇緣。彌陀慈父。親爲導師。無量壽經。首開寶藏。自性之寶樹蓮池。光明顯現。一體之聲聞菩薩。憶念深長。自是八年。未忘一日。高堂壽考。昆季歡和。後起循良。災祲澹息。亡妻雖逝。託生安養之邦。族戚有緣。

接足佛光之社。佛恩渥矣。圖報未能。忝此虛生。倏年五十。謹遵佛法。修齋懺罪。施食度生。念多劫受生之恩。遍於六道。以爲我造罪之故。墮在三途。鑊湯鑪炭之號呼。無非骨肉。餓口針咽之餓衆。皆屬至親。頭面判殊。而情意莫達。幽明懸隔。而痛苦不聞。昊天之德。終古難酬。慚愧之衣。何時可脫。入大海求如意珠王。無如淨法。於火宅現青蓮華座。不外唯心。用是頂禮慈悲三寶。虔求清淨比丘。於觀世音大悲菩薩成道之辰。設阿難尊者施食瑜珈之會。復集信心居士。同持萬德洪名。伏願佛恩普被。飢者得飫。渴者得漿。痛者得息。苦者得康。縛者得脫。願者得償。老者得養。病者得強。夭者得壽。災者得祥。恩者得報。怨者得忘。迷者得慧。暗者得光。穢者得淨。惱者得涼。修者得證。魔者得降。苦海澄清。爲般若航。地獄消滅。爲菩提塲。娑婆久客。得歸西方。下劣凡夫。得覲法王。同成正覺。普度十方。世出世間。福慧無量。伏惟諸佛尊法聖僧三寶威神。慈悲證知。慈悲攝受。謹疏。

爲妻汪氏五十生年設供佛施食道塲疏

伏以如來爲十方慈父。宏法卽以報恩。衆生皆過去六親。拔苦尤當予樂。苟通誠懇。無別幽明。謙妻汪氏。自初結髮。卽有同心。常修克己之行。每抱利人之願。及聞佛法。益植信根。習戒持齋。放生止殺。虔修淨業。回向西方。惟凡夫罪垢滋多。况宿世冤愆何限。以功不掩罪。故病未去身。行年五十。當知四十九年之非。所願衆生。同除百八煩惱之病。是用求哀懺悔。頂禮大慈。施食度生。消災祈壽。乞沛瑜伽法雨。普霑餒口餘生。執持萬德洪名。導往西方淨土。伏願慧燈宏照。三途之癡闇齊消。金掌低垂。四色之寶華湧現。同生極樂之邦。並享無量之壽。竟成大覺。還度有情。並願現世父母六親。咸受如來慈悲正法。蓋纏淨脫。病苦不生。福慧雙修。自他兼利。永作菩提眷屬。毋忘淨土津梁。盡此安穩報身。得與莊嚴海會。伏求三寶攝受。證知。謹疏。

禮齊雲山上帝道場疏

伏惟上帝尊居忉利殿。冠須彌。是三十三天之主。爲四大部洲所依。我南閼浮提環拱衆生。仰爲北極。昔釋迦世尊。爲母說法。升此天梯。般若智慧之音。被夫九界。慈悲

光明之雲。周於四維。佛恩蕩蕩。帝德巍巍。弟子籍居瞻部。夙隸耕稼。食息光風之下。歌吟大化之中。往年父母妻孥有病苦之厄。賴我慈悲覆幬。施振拔之恩。昊天罔極。微報何從。弟子受生多病。夙業所鍾。自參大法。知三世因果之義。乃知此身爲千生罪垢之叢。其時在通在滬。屢瀕於危疾。維我母也妻也。默禱於慈尊。齊雲岩嶢兮。鄉邦之所望。帝德廣博兮。與物而爲春。常勤瞻仰之思。而勝緣未遇。昨感亡妻之夢。而愈歎於中。茲值良辰。息心齋戒。謹遣兒子有朋。從子有傳。恭詣道場。敬酬夙願。伏願光天廣覆。甘露宏霑。高堂健福。後起良賢。宏法安敢不勉。微軀幸獲康全。尤願薄海兵戈不動。鄉民耕作安然。一切含靈。同歸忱於三寶。盡此形壽。乃託化於金蓮。此則大威大德。尤爲無量無邊者矣。伏乞慈悲矜鑒。謹疏。

代汪序昭翁八十壽施食疏

伏以六道四生。是有情之苦海。十方三世。惟我佛爲慈航。弟子鳴球。幸託人身。年將八十。兒孫繞膝。衣食充盈。念所受無非佛恩。敢忘報答。於世法得施綿力。不避勤勞。

建修祠廟。安我先靈。儲積義倉。濟茲貧乏。創校延師。助兒童教育之費。築堤灌水。復流沙壅沒之租。鋪造路橋。瘞埋枯骨。齊雲寶殿。隨喜助修。安士善書。捐貲流布。不幸兵災之及。惟求村族之安。任費任勞。不尤不怨。惟念多生業障。積若須彌。若非我佛慈悲。云何解脫。敢仗瑜伽。啓普度無遮之會。以茲功德。結往生極樂之緣。伏願三寶慈光。遍周沙界。衆生佛性。湧現蓮花。持彌陀萬德洪名。息業海無邊駭浪。金掌低垂。苦輪立脫。捷於彈指。逕抵西方。寶池化現。親聞如來說法之音。聖衆與居。豈羨塵世無常之樂。以是得不退轉。直至成大菩提。還度羣迷。同臻淨域。凡斯祝願。伏乞十方三寶。攝受證知。謹疏。

爲大販汪啓疆薦祖母疏

伏念法華經云。三界無安。猶如火宅。衆苦充滿。甚可怖畏。常有生老病死憂患如是等火。熾然不息。是故十方如來。早離火宅。衆生下劣。猶着貪癡。衆苦所燒。經於累劫。其爲可憫何如也。此由千生罪垢。蘊積至深。三世報償。牽纏無已。自非莊嚴寶手。誰

與垂援。不遇甘露法王。安能濟拔。弟子啓疆祖母葉氏。年已八旬有六。得壽豈非善因。痛於四月望夜。遇火而罹慘斃。花報若此。果報如何。與念及茲。悲傷何極。謹延淨侶。虔建道場。哀求十力慈尊等度。三途苦惱。伏願慈雲廣覆。火坑盡化蓮池。法味宏施。逝子咸歸慈父。佛號一聲。消億劫之重罪。懺悔一炬。破闇室之長冥。極樂真是家鄉。無憂劫火。菩薩皆爲伴侶。永脫苦輪。自己身登蓮品。更當迴度娑婆。普與法界有情。同坐如來之座。凡斯祝願。伏乞十方三寶。慈悲攝受。謹疏。

爲大賑火災修懺疏

伏念十方慈父。惟我如來。衆生業報。不離因果。結縛皆由一念。解脫亦惟一心。苦由罪生。火因瞋致。寒山大士偈云。瞋是心中火。能燒功德林。欲行菩薩道。忍辱護瞋心。一念瞋心滅。卽是普賢行。故息瞋之勝行。卽滅火之神功。惟三寶之金言。實衆生之慈筏。除罪消災。無如懺悔。普賢妙偈。持誦毋忘。我昔所造諸惡業。皆由無始貪瞋癡。從身語意之所生。一切我今皆懺悔。本斯聖意。敢白愚忱。弟子等世居大賑。濱止鱸。

溪數年屢見火災。今歲又遭慘厄。痛八旬之老嫗。殉一炬之炎威。憫果懺因。懲前戒後。爰邀舉族同禱慈雲。伏願阿彌陀如來。錫以功德之水。觀世音大士。灑以楊枝之露。共開慧解。同懺夙愆。人人念佛戒殺。家家積善降祥。睦族敬宗。孝親慈幼。矜憐孤寡。扶植善良。五戒普持。三災永息。四時調順。百穀豐成。生者長保吉祥。歿者得生極樂。凡斯祝願。伏乞三寶慈悲。證知攝受。謹疏。

代江義成撰禮上帝疏

伏以白嶽嶽崎。天生福地。玄天高覆。世仰慈雲。弟子生年五十。効力農田。久沐洪恩。慚無微報。謹奉法香。拜瞻寶殿。伏願四大安康。家庭順利。亡父先靈。早生淨土。兒孫後葉。世出善良。以忠厚爲家財。歸西方爲樂國。尤願年年豐熟。處處清平。各各報恩。心心向佛。諸惡莫作。衆善奉行。同念彌陀。同生極樂。同成正覺。同度衆生。上答覆載之恩。廣濟有情之苦。謹白愚忱。伏祈帝鑒。謹疏。

又代撰報恩疏

伏念十方慈父。大悲施化。種種方便。等濟羣生者。以佛眼觀諸衆生。皆多劫互爲親友。於我有恩。義當圖報。况現世生身父母。而不思救拔。報罔極之恩於萬一乎。釋尊升忉利天。爲母說法。目連奉盂蘭盆。供佛度親。大哉道乎。無以加於孝矣。弟子兄弟四人。生自農家。先父早逝。孝養虧違。我母余氏守節。鞠育艱苦。兄弟等方獲自立。母余氏已屆髦年。竟於本年○月○日。不幸捨報長逝。享壽八十二年。嗚呼痛哉。生養已矣。逝報何從。念維皈佛修法。賑孤拔苦。以斯功德。迴向二親。信願念佛。求生淨土。謹遵釋迦聖教。花開見佛。悟證無生。長侍彌陀如來。並願九有三途。咸離苦海。四生六道。同造樂邦。弟子兄弟。因沐恩而堅信。家人後裔。以信佛而愈昌。無盡下忱。仰維聖鑒。

代汪女居士賑孤疏

伏以十方三寶。爲照世之明燈。六道四生。依如來爲慈父。信女曹汪氏。及笄之歲。卽發信心。最近數年。得聞淨法。舊秋病篤。許願給孤。以沐慈恩。輕安四大。更求佛力。廣

濟三塗。所願家庭順利。世代善良。處處和平。年年豐熟。尤願十方一切衆生。上自有頂。下至阿鼻。諸惡莫作。衆善奉行。同念彌陀。同生淨土。同成正覺。同度衆生。以極樂爲家鄉。作菩提之眷屬。伏維慈悲三寶。攝受證知。謹疏。

代撰汪濬明賑孤疏

伏以五濁忍土。四生六道。長劫沉淪。生老病死。憂悲苦惱。鮮超悟者。惟我釋迦如來。十方慈父。二千年前慈悲說法。開優異門。教離穢土。指歸淨邦。精誠十念。念彌陀名。捨此障身。樂邦境現。彌陀接引。永出輪迴。漸階補處。淨法東來。至今不替。婦孺能知。西歸四衆。代不乏人。雖然彌陀易念。淨土易生。娑婆衆生。業障偏重。人身難得。佛法難聞。非大善根福德因緣。曷由起信。弟子如昌。父早棄養。十八歸嗣士林公。得先姊助。習業崇明。歸來成家事畜。年甫廿九。嗣父棄養。念佛西歸。逾年姊氏隨之西去。皆夙具信願。正念往生。嗣母游太孺人。年階八十。覩世無常。亦隨念佛。間持六齋。參加蓮社。佛七勝會。聞法歡喜。習回向偈。前後數年。近更誠懇。嗣因衰病。展轉牀褥。間失

正念。然至命終。尚憶洪名。如此正念。當得往生。當臨去時。獨少病苦。安祥徐逝。亦屬甚難。伏念嗣母。生平健壽賢明。宿具福德。而半年病苦。想因念佛。重報輕償。多生業障。因茲消釋。生前敦囑。念佛賑孤。爲生西助。茲依正法。供佛誦經。齋僧普度。弟子生平一毫之善。並願回向。上報四重之恩。下濟三塗之苦。洗懺多生重障。同歸極樂淨邦。惟彌陀如來。垂手接引。蓮池寶樹。如願託生。諸上善人。同偕不退。究竟成佛。還度衆生。並願娑婆。四方平定。國泰民康。同修淨法。普度含靈。無盡下忱。伏祈慈鑒。謹疏。

代撰汪鍾峻薦父施食疏

弟子爲先父○○六旬冥壽。虔設瑜珈施食道場。齋潔修誠。稽首上疏。伏念蓮座深慈。三有同沾恩澤。菩提妙法。衆生應共皈依。生者得叨法益。亡者亦獲超昇。况復慧日常輝。曇花遍現。但本懇敬之忱。勤持佛號。必證無生之果。託跡金蓮。弟子偷生濁世。涸跡市塵。孽積厥躬。禍延先考。年近知非。遽終世壽。在疚煢煢。空灑蓼莪之涕。隱憂悄悄。敢忘寸草之心。痛思吾父少嫻儒教。壯涉商塵。閑靜少言。慎修寡過。惟多生

之功罪難知。故輪轉之升沉莫測。非仗如來十力。難超此界三途。况求極樂棲身。尤賴彌陀垂手。茲值六旬冥壽。謹開施賑道場。恭持萬德洪名。廣餉無邊法味。伏願十方苦海。同息危波。九界衆生。同登寶筏。懺拒高燃。福城同住。同念彌陀。同生安養。同成正覺。同度有情。以此功德。回向慈父。兼資悲母。歿者早皈樂土。高生金臺。生者並沐慈恩。歸心淨法。尤願王父期頤愈健。闔家福樂駢臻。弟子當力宏正法。上報隆恩。三寶慈悲。伏惟攝受。謹疏。

集賑日本震災疏

伏以末劫災多。非善莫救。衆生業重。唯心所生。况此次日本地震奇災。尤洪荒有史以來罕見。平日嗜利嗜殺。一旦突如焚如。唯貪瞋癡三毒蔓延。致水火風三災洊至。東京橫濱五都之街市。轉瞬成空。科學武力。積世之經營。一籌莫措。倘因譴怒而生覺悟。則禍已往而福將來。同人等自惕障深。憐他慘痛。數十萬生靈猝斃。焚壓堪憐。六百萬無家可歸。饑寒待拯。爰竭棉薄之力。自慚杯水車薪。但求悲願之伸。遑論一

錢尺帛。凡有善願。悉列捐單。謹白微忱。仰祈慈力。所願濟生度死。苦厄齊消。從茲懺罪洗心。禍機不伏。心心有佛。火宅亦現青蓮。各各報恩。寰海咸歸白法。同人等亦願以是功德。懺多生之業障。保大地之安甯。盡此報身。普與衆生。同生淨土。下忱無盡。聖庇有加。同人等不勝拜禱之至。謹疏。

祭周王請戒殺文 俗稱重陽菩薩

江求覺稿陽復修正

維中華民國九年。庚申九月八日。弟子江某等。爲神人拔除殺業。謹具蔬素。昭告於仁孝周王寶殿之前。伏以明德維馨。無取腥羶之薦。克誠用享。奚須牲醴之陳。是以薄物可薦神明。溪毛不嫌其非。殺牛不如用禴。易卦已有明文。况我周王仁覆無疆。孝思不匱。其不嗜殺也必矣。乃以士女之祈禳。或感應求之靈異。每歲重九之節。拜者紛來。所殺薦神之鷄。動以百數。本欲報恩。而轉爲肆惡。將欲求福。而轉以招殃。神明雖吐已種業因。若果夙習之不移。未免輪迴之被束。同人等夙叨神庇。誼當報恩。勸釋鄉人。稱揚聖德。仁民必當愛物。戒殺乃可求生。倘神許爲細流之助。願加福於

不殺之人。俾得同歸淨業。果證菩提。更教廣濟羣生。慘離冤報。共脫三塗之厄。用宏無量之慈。以救苦爲資糧。萬家同庇。滌腥熏於下土。百福駢臻。同人等謹當潔齋念佛。以是功德。願助神明。早生極樂國土。疾成無上菩提。無盡微忱。統希靈鑒。謹疏。

爲大販汪煥輝作薦父疏

伏念多劫苦輪。自心所造。千年暗室。一炬能消。惟我佛爲世間之眼。俾羣盲知所歸依。惟至誠爲入聖之門。雖下品猶生極樂。弟子新逝慈父汪育章。秉心忠直。任事勤劬。本宗越國之祠。鳩工採木。大士靈山之閣。勵志期成。此皆未明而興。盡瘁乃息。効勞數載。不懈一心。卒使傑構凌雲。梵音振世。聞護生之德。印施戒殺經文。知淨土之歸。持念彌陀聖號。此次安詳捨報。想應隨佛歸西。弟子煥輝痛心失怙。誓願報恩。虔修施食之儀。願作資糧之助。伏祈三寶慈舟。盡拔四生苦海。皆以一心佛號。共登九品蓮台。尤願卽今兵災永息。年穀豐登。家識三歸。人修十善。捐除妄想。回向西方。庶浮生亦享太平。而沒後同生極樂。復願佛慈加被。俾亡父早證無生。家室安康。俾慈

母專修淨業。弟子當努力精進。報佛深恩。謹白誠詞。伏惟慈悲三寶。證知攝受。謹疏。

代汪作屏賑孤薦祖報恩疏

伏以盡孝報恩。無過致親極樂。度生脫苦。卽爲報佛深慈。弟子祖父鳴球。起家貧寒。享年八二。兒孫繞膝。衣食充盈。念所受無非佛恩。常思報答。於世法得施綿力。不避勤勞。建修祠廟。妥我先靈。儲積義倉。濟茲貧乏。創校延師。助兒童教育之費。築堤灌水。復流沙壅沒之租。鋪造路橋。瘞埋枯骨。齊雲寶殿。隨喜助修。安士善書。捐貲流布。不幸兵災之及。惟求村族之安。任費任勞。不尤不怨。比年以來。勤修淨業。歸志西方。寒暑晨昏。無間行住坐臥。不忘。雖足疾偶膺。而心懷自在。安排後事。皆若先知。果也。桐葉落時。法爾蓮花瑞應。頂溫體軟。志定神怡。已遂生西。蓋無疑義。惟念衆生罪苦。量過恆沙。若非我佛慈悲。云何普度。敢仗瑜珈。啓普度無遮之會。以茲功德。結往生極樂之緣。伏願三寶慈光。遍周沙界。衆生佛性。湧現蓮花。持彌陀萬德洪名。息業海無邊駭浪。金掌低垂。苦輪立脫。捷於彈指。逕抵西方。寶池化現。親聞如來說法之音。

聖衆與居。豈羨塵世無常之樂。以是得不退轉。直至成大菩提。還度羣迷。同臻淨域。凡斯功德。同向祖父先靈。祝願早證無生。早成正覺。廣度含識。永庇後昆。伏乞慈悲。三寶證知。攝受。謹疏。

吳箴香禱上帝疏

謹齋戒稽首上疏。玄天上帝寶座之前。伏以帝德汪洋。羣生普被。某等兄弟。僻在山居。室仄人稠。乃營新宅。砌石築基。既堅既固。崇墉一面。而有裂痕。恐致傾頽。爰祈帝力。自爾以後。安穩無虞。感戴之忱。匪言可喻。茲當農隙。頂禮雲山。聊申謝悃。伏願威神加被。閭宅安和。子子孫孫。積善致祥。咸蒙庇佑。不勝祈禱祝願之至。謹疏。

爲慈母汪賑孤作增上勝緣疏

伏以親恩罔極。累劫難酬。佛法無邊。衆生宏濟。新逝慈母汪太夫人。淑行勛於平時。懿範稱於族里。母儀婦德。持守無虧。接物待人。仁施尤著。信根早皈。三寶身則表率合家。晚年淨法獲聞。彌堅行願。一時一日。不懈精勤。千聲萬聲。專心繫念。修淨土十

有二年。持洪名已數千萬。知因緣之既熟。微疾遄歸。徵經語之不虛。臨終瑞應。謙等秉承遺訓。不墮歧趨。喪祭飾終。悉遵佛勅。念在世之音容。既杳。俗禮奚報。深恩惟出世之真體常新。佛事殊多方便。爰於三七期內。虔設施食道場。開甘露門。稟瑜伽法。一色一相。莫非法界之圓融。一滴一塵。盡是慈光之化現。普諸佛大悲之旨。結西方最勝之緣。六道衆生。咸爲佛子。三途苦趣。尤可憫憐。敬求 慈尊。廣施無畏。大現神通。化地獄盡成寶池。俾燃飢均飽。法味苦惱消滅。畢脫沈淪。利益沾濡。無間幽顯。趣光明路。大發菩提之心。乘般若舟。卽登涅槃之岸。謙等更求以茲功德。回向新逝慈母。安極樂之居。淨福增進。證無生之忍。佛道早成。並願四恩三有。一切衆生。盡此報身。同生蓮國。謹疏願忱。叩祈慈鑒。伏維慈悲三寶。證知攝受。

祀造祠建寺諸樹神疏

世間一切。唯心所成。十界正依。無非自性。叢林果穀。利濟羣萌。皆由菩薩幻現分形。佛初出世。如暗始明。一切叢林。曲身致敬。恆河旃檀。與佛俱生。採香供佛。逐日輸誠。

逮佛滅度。樹亦凋零。華嚴海會。樹神與焉。樹神之位。屬於諸天。造寺請樹。當先禱神。神若聽許。乃施斧斤。某等敬念永思新祠。擇樹孔多。銜恩未報。負疚如何。惟神諦念。三界無安。西方蓮池。乃真涅槃。聽松古殿。久爲荒壇。仗神功德。新此伽藍。庶幾朝夕侍佛慈顏。早成正覺。普利世間。

聽松庵新殿落成供佛疏

禮伽初祖。柏公松公。繼傳海譜。始開聽松。當明嘉靖。迄清乾隆。二百年間。淨業宗風。賢僧踵接。一源殊流。點石凌雲。繼起箕裘。龍子象雛。遍發及休。于時六邑。嚮風而趨。績溪來者。先後廿餘。脫俗服淨。重獲寶珠。中經喪亂。迭遭難磨。僧譜寺冊。寄於棲霞。爾時住持。衣鉢一家。神靈祕護。又二百年。謙寓棲霞。乃知其然。稟佛告衆。敬以言旋。如鳥歸林。如魚返淵。寺曠無僧。山童無林。殿毀不復。百年於今。乃墾乃植。剏自庚申。桐檉柏竹。以次成陰。惟師炳宗。乙丑來臨。晨鐘暮鼓。乃有梵音。今歲戊辰。聿新正殿。鰲嶺祇園。雲開顯現。彌陀聖誕。虔供香華。自今永劫。普利無涯。

陽復齋文集 議述類

開放山場廣興墾植議

婺源皆山村也。村之四面山場廣闊。而森林種植之利不興者。何也。居斯土者。商多之族。遠出經營。不能自力墾闢。農多之族。或以地非己有。動輒得咎。不敢妄墾。以是濯濯童山。遍於全縣。今欲興墾利。非山主與鄰近客農訂章合辦。則事不能成。訂章之事。二均利。二除害。均利之事。斜坡峻坂。種杉竹。檉柏等永久之利。山主得三四。客農得六七。平坦之處。種雜糧。桐子等物。利歸客農。若平地寬廣。利入多者。得議薄租。客農有利厚。則欣然願承。盡力開闢。常植雜糧。則常往來看護。而山主亦得以不投費。不勞力。而坐享其成。除害之事。訂章以後。無論山主客農。於均利之物。或私採或侵害。均照值加倍議罰。他人燒山侵損者。亦照值加倍議罰。如是合力興辦。十年之後。大利可期矣。

議改良婚禮爲建國興家最先之善法

中庸言君子之道。造端乎夫婦。夫婦之禮。禮之始也。論語云。人而不仁。如禮何。人而不仁。如樂何。又言禮與其奢也。甯儉。又云。禮云。禮云。玉帛云乎哉。樂云。樂云。鐘鼓云乎哉。大哉聖言。不可易矣。薄俗結婚。動輒殺生。以凶爲吉。則違乎仁。動輒靡費。至於鬻產。則違乎儉。動輒爭財。至於失和。則違乎禮。或執古儀。或隨陋俗。或效歐化。皆爲非宜。人倫之始不端。家國之衰由此。謹本先聖遺言。訂爲婚姻善法。使禮俗融洽。貧富皆能。其大要有三。一曰尙慈。二曰尙儉。三曰尙禮。種因旣善。後果必昌。家國之興。基於是矣。庶幾化俗君子。倣而行之。

尙慈則男女兩家。皆須相約。戒殺修善。喫素念佛。節省酒肉筵席之費。捐助功德善舉。爲夫婦造福。爲兒孫造福。並爲一切族親造福。

尙儉則男女兩家。聘贈物品。皆須樸實節省。樸則不尙浮華。實則但求適用。節省則不尙繁多。以所省金珠綢緞及外國奢侈品之費。捐助功德善舉。可爲富家增後來之福。亦可使貧家無婚嫁之難。至於男女禮服。男用藍色布袍。女用淡紅色布袍。冠

履則隨宜用之。

尙禮則議婚之始。男家主婚人。當邀請介賓。同至女家。父母兄長之所。請年帖。議婚式。許婚然後行聘。聘定然後通知迎娶之期。迎女之時。壻當親至女家迎之。入門卽須先禮三寶。禮天地。然後禮女家祖先。然後禮女之父母。兄長。親屬。然後男女行拜見禮。然後分宴。壻及女。食用蔬素。不過十品。出門之時。壻當禮謝女家祖先。父母。兄長。親屬。然後女禮別祖先。父母。兄長。親屬。此時父母當致訓詞。其詞曰。往之汝家。必敬必戒。善相夫子。善事舅姑。善待伯叔妯娌。善教兒孫。勸化家人。同歸三寶。修身化俗。共致太平。汝福必大。汝家必昌。女拜受命。將此訓詞藏之袋中。袋名福命。佩之胸前。然後隨壻登輿。到男家時。壻讓女與先入。入門之時。卽須趁此良時。男女同禮三寶。禮天地。然後禮祖先。禮舅姑。伯叔親長及禮賓。然後男女行對拜結婚禮。此時禮賓當致祝詞。其詞曰。夫婦人倫之始。齊家治國之基。作善降之百祥。賢子賢孫滿堂。豈但一家之福。實爲一國之光。男女拜謝禮畢。卽趁此良時。禮賓二人持花燭送新。

夫婦入房。然後合燕。新夫婦禮賓。夫婦左右分陪之。食用蔬素。不過十品。燕畢。新夫婦禮謝堂上親長。及男女禮賓。既婚之第三日。新夫婦當辦齋。供養三寶及祖先。然後供養父母舅姑。及男女親賓。食用蔬素。不過十品。有力之家。當禮請居士演講三歸五戒經典。並稱念諸佛菩薩名號。以爲齊家化俗。凡百如意之根源。然後新夫婦同出拜祖廟。及親賓之家。於是婚禮備矣。

又尙禮則男女兩家聘贈物品。皆當隨力隨願聽送。辭多受少。不當互相爭論。違失禮意。爲後日家庭不睦親戚不和之起因。移風易俗。修善種福。是在仁讓禮義之家。先倡行之。兩家結婚以後。更須互相勸化。歸依三寶。修持淨業。庶幾生則扶植人倫。沒則同生淨土。其爲功德利益。尤不可思議矣。

又禮記言嫁女之家。三夜不息燭。思相離也。娶婦之家。三日不舉樂。思嗣親也。今婚事用樂。非古禮也。若聽唱戲曲。尤爲非宜。至於薄俗。夫婦交拜時。強婦多拜。而夫不答。或戲慢新婦。出粗穢語。或偷藏新婦用品。而索果食。皆爲惡習。當禁戒之。

念佛儀

一整肅道場

二供香 偈云。願以此淨香。供養十方佛。十方無上法。悲智大菩薩。聲聞聖衆僧。願一切有情。如此香清淨。戒香薰八識。白法被三根。盡此一報身。同生極樂國。南無香雲蓋菩薩摩訶薩。(二稱)

三禱告 弟子○○謹爲現世慈父悲母。六親眷屬。及無始來慈父悲母。六親眷屬。(卽一切衆生)乃至十方法界。有緣無緣。有怨無怨。一切衆生。求離苦海。誕登彼岸。一心皈命西方極樂世界。持念阿彌陀佛。萬德洪名。伏願佛慈加被。我及衆生。曠劫以來。貪瞋癡障。並皆消滅。盡此報身。同生西方。極樂國土。

四念佛 每十念一拜

五念南無觀世音菩薩摩訶薩。南無大勢至菩薩摩訶薩。南無清淨大海衆菩薩摩訶薩。(十念或二三念)

六念大慈菩薩讚佛懺罪回向發願偈。偈云。十方三世佛。阿彌陀第一。九品度衆生。威德無窮極。我今大皈依。懺悔三業罪。凡有諸福善。至心用回向。願同念佛人。感應隨時現。臨終西方境。分明在目前。見聞皆精進。共生極樂國。見佛了生死。如佛度一切。無邊煩惱斷。無量法門修。誓願度衆生。總願生佛道。虛空有盡。我願無窮。虛空有盡。我願無窮。

七禮佛而退

附註 凡禮拜禱告念佛誦經一切儀中。當默想十方世界。及諸佛菩薩羅漢。乃至六道一切衆生。皆此廣大圓滿清淨心中所現。本來一體。非一非異。如此想者。爲發大乘心。大乘者。無所不載之謂也。大學言致知格物。物格知至。廣大圓滿之謂至。感通一體之謂格。中庸言致中和。天地位焉。萬物育焉。又言惟天下至誠爲能盡其性。能盡其性。則能盡人之性。能盡人之性。則能盡物之性。能盡物之性。則可以贊天地之化育。則可以與天地參矣。孟子曰。盡其心者。知其性也。知其性。則知天矣。曰至。曰

致曰盡其義一也。我性、人性、物性。與夫天地之所以化育者。非一非異。故盡則俱盡。知則俱知。所謂其爲物不貳。則其生物不測。其爲物不貳者。卽此廣大圓滿清淨之真心也。行者能以是心念佛。乃至作一切功德時。皆如是觀想。則所謂是心作佛。是心是佛。便爲成佛正因。亦卽實行儒者致知盡性參贊化育之學。儒釋之道。一以貫之。更能以是心求生西方。命終報盡。一心不亂。必得上品上生矣。

念佛觀想禱告行法

注語皆默想作觀

南無常住十方佛（救世慈父照世明燈）

南無常住十方法（一乘之法差別無量）

南無常住十方僧（上求下化悲智雙修）

南無娑婆教主本師釋迦牟尼佛（示現濁世度苦衆生）

南無東方消災延壽藥師琉璃光王佛（消災延壽助生西方）

南無西方極樂世界接引大導師阿彌陀佛（四十八願普攝三根）

南無當來彌勒尊佛（一生補處降化閻浮）

南無大慈大悲觀世音菩薩（以種種形遊諸國土度脫衆生）

南無大慈大悲大勢至菩薩（今於此界攝念佛人歸於淨土）

南無大智文殊師利菩薩（一行三昧諸佛之母菩薩之師）

南無大行普賢菩薩（十大願王導歸極樂面見彌陀）

南無西方極樂世界清淨大海衆菩薩（諸上善人俱會一處）

南無本尊大願地藏王菩薩（爲閻浮提苦衆生作大證明功德主）

南無護法尊天韋馱菩薩（護持正法行人一切安穩順利）

南無護法諸天菩薩（護持正法行人一切安穩順利）

南無西天東土歷代蓮宗祖師菩薩（導引衆生歸於淨土）

南無現代蓮宗老宿印光法師並頂禮宏揚淨業諸善知識（導引諸生歸於淨

土）

禱告 淨業弟子○○○頂禮祝願我○姓歷代祖先及無始父母歷世宗親及我現世慈父○○慈母○○乃至四恩三有法界衆生已生西方者蒙佛加被蓮花早開早見如來早聞妙法早證無生分身十方普度衆生功德圓滿早成正覺未生西方及現在生存者蒙佛加被得大安穩得大精進皈依三寶同向西方盡此報身同生極樂淨土並願諸佛尊法聖僧慈悲加被諸天龍王善神慈悲擁護聖賢早出國亂早平正法宏宣十方底定時雨時晴物阜年豐民安國泰匪災消滅四境安甯一切衆生安穩樂利引導衆生歸依三寶同向西方盡此報身同生極樂淨土。

普勸修行要則

一必須喫素 六齋 十齋 長齋

二日日念佛 行住坐臥不離念佛

三求生淨土 深信力行切願必得往生

四報父母恩

生存者懇勸念佛過去者念佛回向求生淨土

五修持五戒

不殺 不盜 不淫 不妄語 不飲酒

六常親善友

得常聞善言常見善行

七常行勸化

自度度他卽是報佛深恩卽是行菩薩道

八臨終互助

助念佛號暫止哭泣隔日收斂喪祭用素

救劫弭災修身化俗之簡要方法

辛未九月在港口演講

一 學佛之利益

佛是正學。能破邪學。

佛是大學。能通儒學。

佛是正信。能破迷信。

佛是真修。能

破盲修。

二 念佛喫素戒殺放生之利益

能救刀兵水火瘟疫一切之難。能免生死輪回墮落惡道之苦。

三 念佛之行法

每晨盥漱後。正立西向。或跪念。南無阿彌陀佛。十聲。或百千聲。南無觀世音菩薩。三聲。或十聲。南無大勢至菩薩。三聲。或十聲。南無清淨大海衆菩薩。三聲。或十聲。再念發願回向偈。偈云。願生西方淨土中。九品蓮花爲父母。花開見佛悟無生。不退菩薩爲伴侶。又偈云。十方三世佛。阿彌陀第一。九品度衆生。威德無窮極。我今大歸依。懺悔三業罪。身業口業意業爲三業凡有諸福善。至心用回向。願同念佛人。感應隨時現。臨終西方境。分明在目前。見聞皆精進。共生極樂國。見佛了生死。如佛度一切。無邊煩惱斷。無量法門修。誓願度衆生。總願成佛道。虛空有盡。我願無窮。虛空有盡。我願無窮。若能常持普賢菩薩十大願王。以爲助行。可得上品往生。

四 持誦普賢菩薩十大願王之行法

南無普賢菩薩十大願王。一者禮敬諸佛。二者稱讚如來。三者廣修供養。四者懺悔業障。五者隨喜功德。六者請轉法輪。七者請佛住世。八者常隨佛學。九者恆順衆生。十者普皆迴向。

我昔所造諸惡業。皆由無始貪瞋癡。從身語意之所生。一切我今皆懺悔。
願我臨欲命終時。盡除一切諸障礙。面見彼佛阿彌陀。卽得往生安樂刹。
我既往生彼國已。現前成就此大願。一切圓滿盡無餘。利樂一切衆生界。

五 戒殺放生之辦法

凡殺生祭祖祀神及宴客者。以蔬果穀食。或醃臘代之。殺牲制忌者。以念南無阿彌陀佛。及南無觀世音菩薩聖號代之。殺生治病者。以發願念佛喫六齋素。

六齋期
每月初

八十四
日逢月小
於最後兩
日各提前
一天等
及戒殺放生作諸功德事代之。放生時須虔念南無阿彌陀佛。及往生咒。

六 用念佛蓮花圖之利益

可以解除重病。可以超度亡靈。可爲臨命終時往生淨土之助力。凡請用時。須虔誠喫素三日。或七日。設香案。用淨器念佛焚化後。其灰送入河中。千萬勿學俗例。焚化諸經。及往生咒。致增罪過。欲得空白蓮花圖者。可函向婺源江灣佛光社。

請之隨意略繳印費。欲得念過佛號記數與紅蓮花圖者。每張佛號四萬八千聲。須納功德費洋貳元四角。若貧無力者。亦可贈送。

七 入佛光社之利益（總社婺源江灣分社婺源獅田）

入社年費最多一元。其次五角。貧無力者。但具誠心。亦可免費。社中每年供佛念佛送經放生施藥施寒衣一切功德。皆同向諸社友平等共之。故入社諸友。或目瞽復明。或重病得愈。或臨難得脫。或重災得免。或煩惱頓除。或求子得子。或求壽得壽。至於臨命終時。無諸病苦。含笑西歸。所見所聞。不可勝述。每年春冬兩次佛七道場。及每月十齋日。開會念佛。（念佛社友多至百數十人）若身亡社友。通信告知。社中得信。卽爲虔設蓮位。邀衆社友念佛。助其消除業障。得生西方。此種利益。尤爲難得。

八 勸修淨土之利益

大慈菩薩偈云。能勸一人修。比自己精進。勸至十餘人。功德已無量。如勸百與千。名

爲眞菩薩。若能過萬數。卽是阿彌陀。

九 印送此簡要方法。人發願回向。

偈云。願以此功德。莊嚴佛淨土。上報四重恩。下濟三途苦。若有見聞者。共發菩提心。盡此一報身。同生極樂國。

誦經題主儀式

先期二日。虔忱齋戒。至期清肅道場。正中安佛座。供佛像及經卷。以香華淨水淨飯。素菜果品供養兩旁。對設案位。左主位。右題主位。正中下面設案一。爲敬告天地之用。孝嗣叩請諸賓。

一題主賓 二誦經賓 三護法贊禮賓

至期請主入道場。孝嗣叩請諸賓。敬告天地。禮佛念三皈文。念諸佛菩薩名。持大悲咒。孝嗣抱主請題。跪進主。請求大悲水。祝云。一心奉請十方慈父廣大靈感觀世音菩薩降臨道場。加持此水。具大功德。洒沾新逝信士○○○。令其身心清淨。堪聞妙

法持大悲水和硃墨。題主祝。主祝曰。

良月吉日。題主既成。仰承佛力。加被幽靈。彌陀接引。蓮華化生。究竟成佛。還度衆生。留此神主。永底孫曾。孝嗣跪接主。抱主禮佛。贊禮人唱皈依三寶。皈依十方一切諸佛。皈依十方一切尊法。皈依十方一切聖賢僧。孝嗣抱主就位。聽經。念阿彌陀經。往生咒。佛號。回向文。焚化冥財。禮佛謝恩。孝嗣叩謝諸賓。迎主回家。拜主禮畢。

讚歎村人布施作福並勸戒殺放生帖

今歲庚申。明歲辛酉。後年壬戌。聞諸父老。此六十年前之辛酉壬戌。刀兵饑荒之狀。慘不忍言。同人等懲前慮後。防患未來。深惟佛言因果之義。救未來之刀兵。莫如放生戒殺。救未來之饑饉。莫如賑濟布施。適值北五省兵旱奇災。遂以詳情。啓聞里族。勸請布施。乃承衆善。普發慈心。以是益知心心有佛。義舉既成。讚歎曷已。並錄佛經布施作福及戒殺放生故事數則。以供衆覽。

兩漢興學勸農詔令序

既緝兩漢學風三十七人者傳略作而曰。烏致是乎。上之所以爲政教者可觀也。於是錄凡興學勸農詔令。自高帝始。至後漢獻帝止。夫漢之政制。承於秦。本於周。周之士皆受田。秦尙耕戰。漢一天下。六國游士。暴秦尙戰之風驟息。而重農之良法以行。此其一因。漢興八年而令邑立后稷之祀。使童男舞以象教。田芟除耕種芸耨驅爵穫刈春簸之形。孝惠高后之間。置孝弟力田二千石者一人。以勸勵天下。其後以戶口之率。增置孝弟力田常員。凡帝卽位立后立儲。無不遣使賜帛賞資。以示寵異。使天下之目趨於一的。此其一因。自文帝開藉田親耕以供粢盛。皇后親桑以奉祭服。自後雖行幸州郡。不廢親耕之典。昭帝冲幼。未能耕藉。則爲弄田以試耕。天下之風振之自上。此其一因。招集流亡。給荒地。貸種食耕牛。宣利波池水道之事。歲不絕書而復免稅減租。以寬民力。以是齊民歲增闢土歲廣國以之殖民。官以之課最。民以之樂生。所謂下令流水之源也。此其一因。四因者之積。而民氣之實。國力之厚。文景

最盛之世。遠比成康。而以其間敦尚節儉。獎拔行義。廣播經學。夫是故天下茂行績學。而文質彬彬如也。雖兩漢之季。外戚宦官之禍。接於書策。黨錮之禁。駢戮多賢。卒以絕祚。此則專制政治之失。一姓休戚興亡之繫。而其教養政策。固始終可告忠實無罪於國民也。隋唐以來。制重科舉。士不務農。以文教隋。以隋致貧。致弱。而卽以貧弱致亡。語其功罪。詎可同年。夫宣統庚戌六月江謙記。

韓烈士黃梅泉詩文序

苟國有學。無小大強弱興亡。未嘗無人。苟學而通。無新舊文質。未嘗無用。苟死而爲國。無問於事濟不濟。未嘗無所感於後之人。日韓併邦之明年十一月。老友韓金滄江。携其故人黃烈士之詩文二冊。屬爲序。且傳示烈士生平始末。及韓亡後仰藥殉國之節。臨終絕命之詞。余觀之益信。韓不國久矣。而黃君者非其人乎。於時中國方惴惴於世界強弱興亡之懸。全國熱血志士。不惜糜頂瀝血。以爲政治改革之爭。發難武漢之間。而風揚於全國。雄桀之士。虎跳鷹奮。而文人學士。亦攘臂贊畫於其間。

兩月以來。北廷悔禍。且願罷兵。聽民決議。大事之成有日矣。夫韓封始箕子。固吾義軒黃帝之裔。韓之學自中國。而其學之久而失實。全國之士。敝敝於文藝。又與中國同。韓亡而論之者曰。無人焉故也。無學焉故也。學不務實焉故也。韓亡而中國有思焉。思其弊同而禍將及也。前此數年十數年之間。中國憂時之士。憤國之不振亡之無日。或以政爭。或以暗擊。或以蹈海而死。如黃烈士慷慨之爲者。先後相屬。皆以爲智窮事極。無所復之矣。今者中國之事。烈士則不及聞焉。使其聞之。其鼓躍奮發而悔其死歟。夫士生淫昏專制之世。國事一無可措。而但肆於詩文以寄其志。及夫國家不平。宗社淪亡。內度權力之薄。外傷同志之孤。國事一無所効。而但効一死以告後之人。而覘國者猶或致不足焉。然詩文之學。誠無所用。仰藥殉國。誠無濟於時。而孰知其所處之不幸。而其志之可悲乎哉。抑聞之。詩者情之事也。死者志之終也。國家之強弱興亡遇也。遇之幸不幸時也。幸而成不幸而不成者。迹也。而發之者情。成之者志。決之者死。時無常居。迹無常襲。苟情與志之不滅。時其成而用之。其必有幸。

焉。君其以情與死遺韓之人乎哉。則君之死猶生。而君之詩文其亦可以無朽焉。滄江老於詩文。謂其詩學蘇陸。清警富健。而文則近漢魏。其有焉。於其刊也。中華民國元年婺源江謙序之。

李毅達先生鄉諡編跋

李子梅先生既歸道山之一月。其門人高湘與後先從先生哲嗣佩彝亦杭游者。顧公毅等凡一千一百餘人。以先生生平強而能斷。質直好義。按諸諡法。易名毅達。而請謙爲之題。竊嘗見先生峨冠博帶。逍遙水邊林下。以爲有古君子風。亦杭及先生冢孫弁都。又皆忠實於教育事業。益歎先生家學之軌於正焉。因題并爲之跋。江謙題。

學校雜誌發刊辭

雜誌之名。蓋昉於戰國時。荀子勸學篇有學雜誌順詩書之語。楊注。雜誌。謂雜記之書。百家之說也。遭秦燔書。漢黜百家。古之雜誌遂不傳。近世各國學者。彙衆說爲一

編。旬布而月刊之。廣續不輟。以詔國人者。所在多有。吾國人譯其名曰雜誌。復相率仿其所爲。官師學校政論學說。樊然並興。都其目不下數十百種。篤舊者或病其繁猥。然猶未逮各國之多且盛也。吾國學士大夫。奉儒先之教。率不輕於著書。如歐陽公所謂華文少實。俚言俗說者。雖時時有人勇於造述。識者或目笑之。而西人之持論。則以出版之多寡。判國度之文野。其國愈文明者。其雜誌之數愈多。而文字之高下。學術之淺深。足以行遠而傳世與否。在所不計。甲月之新書。乙月芻狗之。丙月則又有其新者。甚則旬異而日不同。晨出版而夕修改焉。其風尚之懸絕如此。謙嘗論之。慎於著書。爲一人之名譽計也。勇於出版。爲公衆之學問計也。槁項黃馘。閉戶屬草。窮老盡氣。成不朽之偉著。藏之名山。傳之其人。其自待誠高矣。而並吾世而生者。不得見。後吾世而生者。見不見。未可必。主經心史。幸而獲傳。其深文祕旨。猶曠世而不遇。解人。縱得一二穎適之士。冥心直契於千百載後。而作者思力所及。直域於此。一二人已矣。苟爲公衆學問計。創獲之說。獨到之見。公布於世。無所吝惜。其宅心既

公而廣。並世之受其益者何限。而分門撰述。人出所長。見智見仁。俟閱者之自擇。其效尤愈於人著一書。雖其間亦有剿說雷同。操觚率爾者。而絜長較短。相劑相鏤。敝帚之珍。亟易而求千金之寶焉。是亦藥孤陋寡聞。故步自封者之法也。孔子曰。學之不講。是吾憂也。講學之術多矣。學校生徒。持其所學。互證參觀。上以就正有道。下以詢於芻蕘。刊爲雜誌。以代筆舌。是講學非著書也。日本區區三島。歲出雜誌二萬五十餘種。大半出於學校。英美諸國所出之數。且倍蓰焉。故居今日而言教育。第以出版之雜誌之種數論。已不克與他國方駕。有志教育者。不可不於此研習而提倡之也。今夏諸生彙所爲論說雜文。刊行雜誌。雖未足媲美他國專門大學之雜誌。然以之爲講學之資。且以增吾國雜誌之一數。固無病其勇於造述也。若夫文字之高下。學術之淺深。則俟海內外君子教之。

題紡織生張琴卷

烏乎。今之學子。可悼者多矣。不早爲謀。追何可及。吾無以塞張生之悲。惟願張生昭

昭之靈。一心持念西方極樂世界接引大導師阿彌陀佛。必獲往生也。陽復齋居士江謙。

募建靈山碧雲庵啓

吾宗自始遷發。以迄今茲三江族姓。閱閱八百餘年。追溯本原。實藉靈山之庇。欲報祖德。當知佛恩。今碧雲庵傾頽復建。正宜乘此機緣。倡明佛法。殿宇雕像。經典俱養之費。約需三四千圓。乃恃一老尼僧。奔走勸募。身親煩惱。實非所宜。謙念茲自慚。禱佛發願。一者願助大衆廣種善根。二者願助大衆完成佛事。三者願爲大衆訪求大德高僧。宣揚正法。夫靈山碧雲菴者。雖三江之故刹。實十方之道場。南唐慕真禪師。此焉成道。山川靈異。又足以瀚滌凡襟。謹爲通告。勸各發心。心力財力。財多財少。本姓他姓。各順自心。同爲功德。自本月始。年終爲限。樂捐者請送寄謙處。於香案前給領收據。功成之日。謹依輸貲先後。及勉力効勞之士。建石留名。謙爲父母祈福壽康。甯爲合家合宗祈和親昌大。爲一切衆生求大利福田。並爲老尼僧一清求功行圓。

成命終之時。各各同生極樂。亦當黽勉樂捐。完成佛事。以從諸君子之後。區區之心。惟大衆鑒之。民國九年庚申三月一日江謙再拜。

題錫之族伯父像

頌鏞言。吾生而吾祖年六十餘。烏知六十以前事乎。吾稍長而慕奢麗。祖責之。爾烏能爾。吾年爾若。饑寒食寒。得與父母團聚者。能入山採兩束薪耳。暇則就人學書算。暢通。賴李姊丈。吾坐莊江西河口。蓄幾萬金。粵匪亂。燼焉。賴李姊丈。吾營浙常鹽。復起。而父母歿。吾蓄心血十餘年。謂得豐養矣。而抱大恨。吾痛之。又以貽害爾曹。吾尤傷也。爾慎之哉。李姊丈者。同邑侍郎李蠡莚先生父。頌鏞又言。吾嘗與姊妹爭祖責之。爾烏敢爾。吾兄早逝。吾每事思共兄一商。問而不可得也。吾教育爾叔。敬事爾伯祖母。而吾猶惘然。爾戒之哉。頌鏞言。真實如是。而曰。吾所得述於祖者。謹爾。不能文也。烏呼。是可以訓示子孫矣。焉用文之。族子江謙敬讀曰。孝友勤儉。得一以興。公之兼是。宜其傑成。吾讀公時。吾猶想見頤軀偉貌。皓鬚之翁。而目光瑩瑩。聲高以

閔也。

頌鏞既述其祖。又言吾祖之助賴祖母。自幼歸吾祖時。家貧。畢嘗困苦。不忘婦職。及家稍裕。祖經營於外。而家政檢飭內之皆祖母力也。待妯娌和。臨下寬。勞處其先。利逸處其後。家以是雍然。族子謙敬讚曰。倡者必有和也。琴瑟之專壹。則不足以感人而格神。況於欲興其家者乎。頌鏞述其祖孝友勤儉贊助而成之者。非宜人乎。是能宜其家人宜其子孫者乎。

大畋咸恩寺記

民國十年辛酉正月。謙與朋輩閒遊大畋東山之麓。榛莽間發見一二百餘年之萬壽庵碑記。菴卽唐咸恩寺故址。記載咸恩寺始末頗詳。唐有御史汪緘家於鏞水之湄。因建是寺。歷宋元明屢圯屢修。皆其子孫一家供養。至清順治有僧募化重建。更名萬壽菴。今萬壽菴之廢且百餘年矣。村人無知其名者。但尙稱咸恩寺。寺之始末父老亦且不能知。一旦重覩是碑。芟闢榛荒。重議興建。游者接踵。皆歎爲奇。而考之

邑志於汪緘及威恩寺記載。皆不可得。後此五月。偶閱夷堅志一則。載婺源山寺威恩院者。意卽指此。因備錄其文。以俟異日參考云。江謙記。

夷堅丙志曰。婺源山寺曰威恩院者。僧俱會主之。惟酒肉錢財是務。晨香夜燈。略不經意。屋廬老壞不葺。毗沙門天王殿圯。卽其柱爲牛欄。恣肆自若。凡四十餘年。雖老不革。乾道元年。神降於法堂。呼俱會名。呵叱數其罪。一小童見巨人大面努目。朱衣長身。震怒作色。餘但聞其聲而已。自是凡僧所有衣襟飲食錢物器具。無不取去。棄擲山林間。村人或拾得之。庖刀至從廚下冉冉空行而出。箱篋匱積之屬。不可提挈者。時時見煙出其中。急發視。悉煨燼矣。僧不勝窘憤。盡裒所餘。散寄檀施家。神夜詈其主云。汝乃蔽罪人。禍且並及汝。其人懼。不敢寢。待旦持還之。狼籍殆盡。乃已。寺後巨竹數百挺。常時非三二百錢不能售一竿。悉中斷之。小童或不見。越二日乃歸云。爲神攝至所居室。屋雄偉華麗。侍衛滿前。大人小兒皆青紫朱衣。亦有賓客往來。使我服侍左右。次日晚一婦人云。久留此童。無益也。揮我使

去恍忽如夢。乃得還。他日又降法堂呼僧出告曰。汝罪上通於天。宜速去。此以弟子智圓繼主之。不爾。我將降大罰於汝。僧涕泣唯唯。徙寓近村客舍。不數月死。

詹節母汪宜人墓誌銘

詹節母汪宜人。婺源龍川詹公起鳳之配。同邑莘源清太學生汪宗祐公女也。年及笄歸詹氏。室家之間。敬順無違。事翁姑孝謹。處妯娌和睦無間言。一家中雍雍如也。清道光庚申歲。賊竄擾婺源。孺人子藩禎君生甫三日。懷襟以從。翁姑避難。備歷艱厄。次歲起鳳公捐背。孺人年僅二十有五。雖茹痛所天。而養老字孤。責萃一身。黽勉婦職。以慰逝者。事在邑志。節孝傳。藩禎君幼多疾。煦嫗周詳。及於成立。授室擇師。殷勤督課。初業儒術。後令習商。資助經營。大著其績。詹氏門閭日昌。洎於晚歲。繩繩孫曾。里族稱盛。皆宜人懃懃教誨撫養功也。先是起鳳公伯氏起龍卒。媳汪氏率其孫百鍊徙居昌江。旋病故。而百鍊姊妹等幼弱。孺人挈回撫養。今婚嫁成室矣。其篤念親親如此。孺人治家嚴肅。然無疾言遽色。終歲不聞呵譴聲。而家人敬憚之。居身儉

約庭內瑣事。雖白髮高年而操作必爲諸婦先。至於布施窮乏。賑救災苦。仁惠稱於鄰里。長孫鳴鐸爲清附生。砥學勵行。有聲鄉里。而宜人每引前言往行。諄諄訓誨。期爲一鄉表率。藩禎君夫婦相繼逝世。宜人適命次孫鳴珂營理浙江生記石門阜生木行事。謂諸孫曰。浙江木行。全家衣食所自。丈夫當志遠方。自任計度。我年雖老。毋以爲念。孺人生道光丁酉十一月初三日子時。沒民國辛酉二月初九日申時。享年八十有五。子女各一。女適余。先孺人卒。孫四。鳴鐸。鳴珂。鳴球。鳴皋。曾孫四。百祺。百祜。百祺。百祜。宜人以次孫鳴珂納粟奉直大夫。銜得封贈。清仁和許太史有鑒。曾題行高冰潔之匾。以彰宜人懿德。而里中紳耆亦請於朝。得旨旌表建坊。宜人可以不朽矣。將卜葬。其孫嗣綴述行狀請銘。謙病拒謝文事。然維孺人之生平。矢清節於英年。而迺休徵於晚壽。福報不虛。爲可風也。爰表而銘之。銘曰。

初遭艱屯。終底於穀。既庶既豫。永衍厥祚。匪砥高節。曷篤之祐。銘以詔後。式昭女族。

吳君念裕墓表

吳君諱念裕。原名農。孫字蠓卿。休甯萬安人也。曾大父志深。清附生。大父啓濤。貢生。皆以君父貴。誥封光祿大夫。父廷芳。進士。官至光祿大夫。左都御史。君父先娶程太夫人。生女一。旋娶張太恭人。卽君兄蝶卿母。又續娶陳太夫人。君所自出也。君生而君父年逾六旬矣。幼而岐嶷。姿稟超異。君父奉召入京。挈蝶卿從。君讀書家塾。性活潑不羈。頗好游。然以賦稟優。故所課業亦不遜其羣。君父以庚子之變歸。遂家居。課子。偶以儷語試君。輒應如響。由是頗得歡心。年十四。爲君授室。時君父已遘疾。丁未病篤。君與兄侍湯藥。克盡子道。父歿。哀毀盡禮。君雖以親疾輟讀。然性喜博涉。能道論古今事。爲文下筆數千言。君父嘗謂蝶卿謹而愿。君敏而果。相資而有以成也。居憂二載餘。皆依兄居。飲食同。出入俱。友愛彌篤。卜葬旣畢。偕兄出游。服闋。逾年入都。君父曾爲君納粟。至是改郎中。分民政部。居數月南歸。是年秋。會武昌事變。遂暫棲滬上。是時留學生多集滬。君意氣觥觥。思有以自見。改革方始。欲灌輸西方文明以

救國弊。於是廣結新學人士。辦書報以牖導國民。既乃趨向實業。民國三年巴拿馬運河初通。美國開博覽會於舊金山。慶其成。君以徽產茶爲通商大宗。然售必於滬。一任市儈之壟斷。而茶商不能操其權。不圖改良製作。自致海外。以外人稱慕之華茶。而獲利乃在日本錫蘭下。是遺大利於不顧也。茶商敝則茶價日賤。茶戶生計益艱。是以地方一切應爲之事業。益廢墜不舉。君乃自備資。隨政府簡派員赴會。攜所自出新意精製之茶數千金。街賈海外。雖茶業積敝。若懸崖危石之墮。非一繩所能繫者。而君志自可稱矣。居舊金山數月。乃遍遊美諸大都會。考察其民風國情。益擴見聞。而尤注意於茶務。君初赴美時。挈譯人以行。居數月。獨往遊美洲諸處。能語言自通。書問無阻。同人皆驚之。返國後。抒其所得。爲調查書布於衆。極致詳於美洲銷茶情形。其振興改良之方。具有規畫。斯時歐戰方殷。茶益敝。茶商無結力。無遠圖。君出其議。鮮應者。而其事造端宏大。故未克舉。君每歎商人之見淺。而慨其志之未伸。至是奮發踔厲之氣稍減矣。然困心衡慮。未必非砥礪智能之資。使天假之年。顧不

能成其志耶。而君竟於民國六年夏歷八月二十四日。疾終於滬。距生於光緒辛卯三月初十日。享年二十有七耳。此知君者所共爲歎惜也。君妻胡氏。子二。曾慧。曾憲女。二君沒逾年。妻子奉喪歸。蝶卿爲之營葬於休北新塘大聯山之原。復爲君妻營生曠其右。以俟異日同穴焉。更撮述其事迹。而請謙表其墓。謙病拒謝文事久矣。然憶曩年養疴滬上。嘗與君過從。君神觀秀灼。談茶事意甚洽。嘉其志而賞其才。又惜其不竟成也。表之其又何辭。系之辭曰。

有志有才以生。胡軛其願而不獲於成。成與不兮。烟雲之幻迹。未足爲重輕。海可竭。分山可崩。一念之善兮。歷永劫而不傾。矧所圖兮。用宏遺念兮。民生後起。無忘兮。文之以銘。

民國十年辛酉。前江蘇教育司長三等嘉禾章記名道尹。婺源江謙敬撰。

詹逢伯公步雲公墓誌銘

詹逢伯公諱大驥。號德菴。步雲公諱大驥。號瑞庵。婺源慶源人。祖諱燦。清太學生。列

縣志孝友傳。父諱開文。清貢生。逢伯公幼隨父賈江右。年十六。父委以賈事。經畫悉當。步雲公居家習儒。幼問業於族姪舉人詹考祥之門。後師同邑董桂敷太史。讀書韓家塢。學有淵源。小試未利。應南北闈試。薦亦未售。遇爲之也。經營貿易。逢伯公任其外。持家養教。步雲公任其內。手足互助之精神。交往無間。遐邇焉。逢伯公遇房姪。滯他鄉。給資勸歸完娶。江右有溺女風。刻文勸戒。并給錢以養。而步雲公析箸後。於諸姪積逋。變屋代償。輕利重義。同也。逢伯公生乾隆庚子。歿咸豐丙辰。年六十七。子七人。步雲公生乾隆丙戌。歿道光壬辰。年七十七。子四人。享高年。縣祀胤。積善獲報。不虛矣。步雲公以子昌期捐理問職。例贈儒林郎。以孫淮生捐州同職。贈奉直大夫。與逢伯公合窆於黃柏充柿樹塢之原。二公事亦著縣志義行質行傳。謙先祖母節孝。詹氏。步雲公女也。撮略屬銘。其又何辭。銘曰。

二公往矣。名不朽。古云惟孝施於友。况兼義行植善因。既植善因果。斯受孫曾緝緝善之餘。繩祖報恩更善後。衆善奉行順佛心。以茲回向諸先人。難兄難弟蓮邦。

友。無量光明作報身。

祭秋浦叔文

嗟叔胡逝兮。海乎中央。去家二千兮。魂魄焉翔。好我平生兮。甯死而忘。禮雖不服兮。親則同房。（於族同爲二房）幼與共讀兮。叔貧而商。吾父之訓兮。叔如圭璋。操奇握算兮。艱瑣畢嘗。澠溜之累兮。不幸以僵。續經困跌兮。舟失其航。謂是礪琢兮。晚器愈光。謂安其壽兮。謂胖其強。天雨降淫兮。民濕而創。禍生肌理兮。若背著芒。瑣瑣無害兮。勿藥將康。醫試其手兮。術太荒唐。日醫步德兮。華者非良。嬉人性命兮。彼固爲臧。胡叔之信兮。大命以戕。鄉讐而絕兮。余聞之傷。願望國人兮。我有歧黃。二子一穉兮。大者爲郎。後死有責兮。叔無憂愴。余睽在通兮。又困於牀。逾月而聞兮。涕沾衣裳。南訊吾兄兮。爲我酤漿。一雞魚及豚兮。或蒸或湯。一視叔所嗜兮。咀嚼馨香。宥之以文兮。告我心腸。嗚呼哀哉兮。尙其來饗。

安葬啓太夫人墓祭文

維民國九年歲次庚申二月二十一日男邦濟率孫敦澍敦謙敦樾敦棧曾孫有朋有林有濂有傳等謹以清茗素饌香楮寶帛之儀百拜致祭於蕭江三十二世先妣詹氏齡賢太夫人之靈樞前而言曰伏以卜兆著於孝經論葬詳夫禮記先人之窀穸未安後嗣之孝思實歎茲於塔坑樟子園求得佳壤取雙龍獻珠形坤山艮向地脈山形和平開展於今月今日吉時安葬伏維太夫人生平節孝勤儉慈善好施歸心三寶故應上邀天相下占地靈得之目前居之永遠佳節新晴天朗氣清曾曾孫子羅拜趨承惟神降福孔碩孔盈世有明德以利羣生設齋供獻永安先靈伏祈歆饗

全村賑孤疏

伏以覺王化度方便多途塵劫雖多慈悲無盡阿難尊者因衆生而發問釋迦教主說妙義以酬機一時啓請千古法傳開甘露之門設吉祥之會今某等蕭梁舊裔託處雲灣祖德家風皈依淨法深念佛與衆生平等非異圓覺無減罪性本空而以迷

執墮落輪迴無超脫之期。業識牽纏。果報有苦樂之異。地獄鑊湯。備多苦惱。修羅餓鬼。誰救饑虛。匪有大慈神力。曷濟苦趣羣機。本此悲懷。虔修廣薦。體諸佛一子之想。與瑜伽最勝之緣。歸依三寶。均報四恩。香篆慈雲。普薰法界。燈明慧日。遍照十方。清涼甘露。滌瑕垢而永溶。上妙天廚。助智慧之增進。滴水深同河海。粒食量等須彌。施周一切。福不唐捐。河沙之鬼神。燃饑普濟。幽顯之眷屬。利益均沾。曠劫沈淪。同時解脫。無量罪報。盡獲消除。變地獄成莊嚴之寶池。化火湯作醍醐之法水。永離邪行。發菩提心。共捨迷途。登涅槃岸。十方慈父。攝受證明。自利利他。願求滿足。某等以此無遮功德。回向西方。全村居民。集福消災。一切衆生。懺罪修慧。各各盡此報身。同生極樂國土。我願無盡。佛語不虛。謹疏。

作福報恩疏

一四天下。南瞻部洲。中華國江南安徽省婺源縣萬安鄉大鱸里雲灣義興大社信士弟子江謙等。爲嚴親七旬大慶。作福報恩。賑孤酬願。事先期齊家齋戒。卽日盥手。

拈香百拜上疏。南無本師釋迦牟尼佛。南無東方消災延壽藥師佛。南無西方極樂世界阿彌陀佛。南無大慈大悲觀世音菩薩。南無大慈大悲大勢至菩薩。南無十方三世諸佛諸大菩薩。一切聖賢僧蓮華寶座前。伏以孝可通神。義莫隆於一本。慈能普濟。恩遍逮於羣萌。幸三樂之具存。加護惟祈佛力。推四恩之廣報。十方猶是家人。喜家君福壽康甯。古稀自得。惟我佛慈悲清淨。方便多門。轉四諦之法輪。塵迷盡揭。顯六通之神識。苦厄全消。此所以廣闢祇園。願拔三途之困。大宣清梵。期空萬有之緣也。弟子父本遺腹之孤。樂賢母之育。好善出於至性。信道老而彌堅。今則萱花並茂。蘭蕙紛羅。德本雖植於平時。福田尙思夫廣種。弟子等敬承慈命。三寶皈依。廣布法施。九幽共濟。修福期於增福。默祝期頤。推恩卽以報恩。圓成妙果。孟蘭盆宏施法味。非祇度七世之親。法華會廣布妙音。冀肅淨多生之障。唯心淨土。華開七寶莊嚴。諸佛世尊。法與一堂共說。證生西於他日。身是菩提。矢大願於未來。人皆歸佛。壽光無量。福樂齊臻。無盡下情。仰邀聖鑒。不勝齋肅懇求之至。謹疏釋迦文佛降生後二

千九百四十八年庚申六月

附賑孤台聯匾

海潮音

乘般若船度一切衆 登涅槃山吹大法螺

光照十方

一切衆生皆我佛子 十方世界是如來家

南無阿彌陀佛

慈意妙大雲 慧日破諸闇

賑孤酬願文

一四天下南瞻部洲。中華民國江南安徽省婺源縣萬安鄉大鑪里雲灣義興大社。信士弟子江謙等。爲賑孤酬願事。先期齊家齋戒。卽日盥手拈香。百拜上疏。南無大慈大悲救苦救難觀世音菩薩蓮座前。伏以悲智兼修。妙證菩提之果。色空兩徹。高

居最上之乘。解除十二因緣。愛根先決。超出大千世界。覺行常圓。培苦本而著苦華。憫衆生自尋煩惱。無疑心安。有疑土知一念。卽擢清虛。弟子等素荷鴻慈。心儀至教。年逾強仕。每憂多病之身。隱賴加持。敬矢皈依之願。悟凡夫多病之因。皆夙生業緣所致。非歸佛法。莫予消除。用是著慚愧服。然懺悔炬。念四十八願之宏誓。普濟羣生。求三十二應之法施。大開方便。迎來慈駕。虔繙貝葉之經。藉拯幽孤。高灑楊枝之露。恭維大士婆心救世。無量渡人。智燈常燭。夫昏衢。寶筏時航於苦海。盂蘭盆宏施法味。恆沙數同飫恩膏。出諸佛廣長之舌。徧覆塵寰。攝衆生清淨之身。同生極樂。旣被超騰六道。安有滯於三途。惟當廣濟十方。又私祈乎五福。歡承具慶。堂上之活佛。藉祝長生。代有達人。後世之子孫。常歸三寶。雙修眷屬。生西同訂他年。偕老時期。視履悉臻元吉。仗降魔之杵。用去病魔。俾願力之資。得宏福力。千祥雲集。萬禍冰銷。繼自今茲。益當努竭綿薄。宣揚淨法。以答宏施。無盡下忱。仰邀聖鑒。弟子等不勝惶恐上干之至。謹疏。

辛酉雲灣捐振蘇皖浙水災報告疏

伏以如來大慈。濟渡無盡。衆生障重。災咎滋多。頻年戰禍。民生敝於兵爭。比歲不登。物力匱於地產。旱魃已逞。威於北。淫潦復肆虐於南。蘇皖浙三省。沿江海居民。屋舍田園。盡遭淹沒。生命財產。付諸洪濤。災區蔓延。嗷鴻待哺。前車示戒。業報有因。來軫知防。慳囊宜解。同人等共懷悲願。勸播福田。集村人勉力布施。聯信士虔忱懺悔。幸逢觀音大士涅槃吉日。大慈大悲。救苦救難。爲十方之慈父。施無畏於娑婆。用是供養瞻拜。持咒誦經。伏祈示慈悲觀。出沈淪於苦海。現神通力。得解脫於危途。一搏之食。普及災黎。一錢之施。咸蒙聖錄。敢祈消除災難。更願增進善根。以是功德。迴向西方。盡此報身。同生淨土。衆生界盡。同人等願無盡。不勝悲懇皈依之至。謹疏。

爲北方災民祈禱疏

清信士弟子某某等。爲北五省災捐。譁具疏文。開列助賑姓名捐數。宣讀報告。念佛誦經。普爲求福。卽日盥手拈香。虔忱上疏。南無大慈大悲。救苦救難。觀世音菩薩蓮。

座前。伏以災象薦臻。道僅連縣於五省。嗷鴻待哺。哀聲直達夫層霄。非大慈甘澤宏施。則小民生機曷振。直魯晉豫陝。有男女卅五兆人命之危。兵匪蝗旱災。約縱橫二百萬方里之廣。欲逃無路。何處投生。相距匪遙。豈容坐視。同人等各本良心之痛。努力輸將。尤深飯命之忱。籲哀拯濟。乞無礙大悲之水。盡滌窮愁。於十方慈父之前。代爲懺悔。只爲貪慳之業。種此惡因。還求無畏之施。出諸苦海。死者無入餓鬼之道。生者咸沾鼓腹之恩。樂業安居。消災獲福。同人等具陳宏願。虔誦經文。持八關齋。念千聲佛。冀一搏之食。普及災黎。爲助振之人。並求福利。但期不測之災。永離此土。更願以是功德。回向西方。無盡悲忱。仰邀慈眷。謹疏。

禮懺疏文

一四天下。南瞻部洲。中華國安徽婺源縣。萬安鄉大鑪里。雲濤義興大社。清信弟子蕭江○○謹爲亡妻方氏。夙業糾纏。慘罹非命。沈淪惡趣。冀獲超昇。本慈尊之宣示。救面然之遺經。開甘露門。設吉祥會。闔家齋戒。虔忱默禱。願憑佛力之慈。速解幽冥。

之苦。敬擇良辰。延僧禮懺。藉茲三昧之水。洗除累世之愆。南無本土本師釋迦牟尼佛。南無大悲觀世音菩薩。南無幽冥教主地藏王菩薩。伏維大德洪名。能消億劫之罪愆。法力宏施。可釋諸般之怨對。慧燈普照。諸闇潛消。鬼趣煩冤。同時解脫。泐下忱而疏陳。祈慈尊之愍鑒。伏以惡趣衆生。苦痛無量。世尊慈願。救度無邊。願蒙神力之加持。同獲法味而解脫。以是功德。超度亡魂。遠離惡趣。歸依三寶。回向西方。如來接引。蓮華化生。並願十方一切衆生。各捨輪回。受報身。同歸極樂莊嚴土。謹疏悃忱。伏惟慈鑒。謹疏。

